

خيالك سعيد

خيالك سعيد

مصطفى السيد سمير
الطبعة الأولى ، القاهرة 2017م
غلاف : أحمد فرج
رقم الإيداع : 2016/ 26984
I.S.B.N: 978-977-488-492-4

جميع حقوق النشر محفوظة، ولا يحق لأي شخص أو مؤسسة أو جهة إعادة إصدار هذا الكتاب، أو جزء منه، أو نقله بأي شكل من الأشكال، أو وسيلة من وسائل نقل المعلومات، ولا يجوز تداوله إلكترونياً نسخاً أو تسجيلاً أو تخزيناً، دون إذن خطي من الدار



دار الكتب للنشر والتوزيع

العنوان : 12 ش عبد الهادي الطحان ، من ش الشيخ منصور، المرج الغربية ، القاهرة ،

مصر

هاتف : 01144552557 — 01147633268

بريد إلكتروني : daroktob1@yahoo.com

جميع الآراء الواردة في هذا الكتاب تعبر عن رأي كاتبها، ولا تعبر بالضرورة عن رأي دار النشر.

خيالك سعيد

حواديت

مصطفى السيد سمير



دار اكتب للنشر والتوزيع

إلى البنت اللي نوّرت النور

رفعت البنت وشها من الكتاب فجأة، وبصت له فقال لها:

- صباح الخير.

ضحكت، وقالت له:

- إنت جديد هنا، مش كده؟

استغرب الولد قوي، وقال لها:

- أيوه عرفتي إزاي؟

قالت له:

- عشان إحنا هنا ماعندناش صبح، ولا ليل، كل واحد قاعد في

الجو اللي متخيله، أنا مثلاً دلوقتي قاعدة بالليل، والقمر هلال، وفيه

نسمة هوا خفيفة، حلوة ريحة الريحان بالمناسبة.

الولد انبسط أكثر، واكتشف إن فيه حاجات كتير حلوة هنا.

قالت له:

- إحنّا بنقول "خيالك سعيد"، فأنا أرد عليك، وأقول لك:
"وانت كمان".

قول لي بقي،... إنت جيت منين؟

قال لها:

- من عند شجرة العنب، واسمي...

قالت له:

- مش مهم اسمك، ماحدش هنا له اسم، كل واحد بيسمي الثاني
حسب ما هو شايفه. إنت اسمك عَناب.

ضحك الولد قوي، وقال لها:

- إشمعني؟

قالت له:

- عشان أسمر، ودمك خفيف.

قول لي يا عناب، أنا اسمي إيه؟

فكّر الولد شوية، وقال لها:

- اسمك هوا...

قالت له:

- ليه؟

قال لها:

- عشان خفيفة قوي، وبتخلّي الواحد يضحك، وانتِ بتتمرجحي،

إنتِ بتقري إيه؟

مدّت هوا إيدها بالكتاب لعنّاب لقي الكتاب فاضي، رفع

حاجبينه، وقال لها:

- الكتاب فاضي، مافيش سطور حتى!!

قالت له:

- هنا مافيش سطور حد كاتبها لك، إنتِ بتختار السطور.

أنا مثلاً باقرا دلوقتي في رواية العجوز، والبحر، وغيّرت اسمها
خلّيته البحر اللي يحب الهزار، عشان بعد ما إدى للصياد سمكة
كبيرة راح جاب قروش كثير كلت السمكة بتاعته، هزار ده ولا مش
هزار؟

عنّاب انتبه إنّا بتسأله بعد ما كان سرح في كلامها، قال لها:

- إنتِ بتحيي القراية زيي، إنتِ جيتي هنا ليه؟

قالت له:

- عشان برّا مابقاش في خيال، شالوا الشجر اللي حوالين بيتنا، وزرعوا نخل غريب، أبيض، وطويل كأنه مقالة دمها ثقيل، وماينفعش يتعمل مُرجيحة. والمس اديتي كمان في المدرسة علامة حمرا عشان كتبت عن البلوزة بتاعتها في موضوع التعبير.

قالت لي إيه علاقة البلوزة بتاعتي بالربيع؟

ضحك عناب قوي، وهي بتقلّد المس بتاعتها، قال لها:

- قلتيلها إيه؟

قالت له:

- لا اتخيل إنت، المفروض على فكرة مايقاش فيه كلام بيتنا، إحنا بنقدر نتخيل من نظرة العين أو طيران الشعر مع الهواء، بس أنا باتكلم معاك عشان إنت جديد.

حواديت الورد الأخضر

في يوم من الأيام الصبح بدري، وقفت أُمِّي قُدَّام دُولاب الأُمْنِيات،
وهي محتارة، تلبس إيه؟ تلبس إيه؟

قعدت تمرّر إيديها في صف الأُمْنِيات الدافي لحد ما نَقَت أُمْنِيَة
خفيفة لونها وردي عليها ورد أخضر، عمري ما شفت ورد أخضر في
حياتي إلا في أُمْنِيات أُمِّي. لبستها وقفلت الباب وراها ونزلت.

في الأَتوبيس كان الراجل اللي قاعد جنبها يقرأ جرنان النهارده،
وكان فيه خبر حلو قوي في الصفحة الأولى، حلو لدرجة إن الورد
الأخضر كان بيتحرك بشويش ناحية الشباك.

قعدت تراجع هي عاوزة تشتري إيه: شمعتين ملونين وكيلو
شمش وقزاز جديد للشباك بدل القزاز الثاني، اللي شيلناه عشان
لونه اتغير من الأغاني العالية اللي كانت شغالة في الشارع إمبارح.

أُمِّي حكّت لي بعدها إنَّها ما كانتش عاوزاني أبتدي الحياة جَوَّاهَا،
وهي نائمة في أوضة فيها شباك لونه مطفي.

معجون بشمس الخيال

زي كل البنات، الشمس كان عندها علاقة مُربكة مع شعرها.
ساعات بتقصه لحد ما يبقى قصير قوي، ووقتها مش بتحب تزور
حد، ويتاخذ جنب بعيد عن الناس، وصوتها يبقى واطي جدًا،
وساعات بتسييه يطوّل لحد ما يوصل للأرض، وبتنزل تجري في
الشوارع، وتحط على الشماسي بإيديها، وتزور مع الناس هزار ثقيل.
وكانت عارفة إن فيه ناس بتحب شعرها قصير، وناس بتحب
شعرها طويل، إلا واحد بس، كان بيعحبها طول الوقت.. كان ولد
ترزي، وكان الوحيد في المدينة اللي مش بيعط ستاير على الشبايك،
لا في الشتاء، ولا الصيف، هو بس كان بيعتبر مكان السرير بتاعه من
الشباك حسب مزاج الشمس اليومين دول، ولما حد يسأله عن السبب
كان يقول:

- لو عايز تحتفظ بجد يبقى لازم تغيّر المسافة بينك، وبينه من وقت للتاني لكن إوعى تخط بينكم ستاير.

وقت ما يكون شعر الشمس طويل كان الولد بيلون القزاز، الشمس اللي شعرها طويل بتفرح قوي بالقزاز الملون لدرجة إنها ممكن تحضنك طول اليوم، ولما يكون شعرها قصير بيقعد معاها في البلكونة كتير من غير ما يتكلموا.

الشمس بتحب اللي مايتضايقش من سكوتها أو يضغط عليها عشان تتكلم.. عشان كده الشمس كانت بتدخل بيته من غير استئذان، وتقعّد براحتها كأها في بيتها بالطبط، ولما يكون عندها شغل بعيد بتبعث له رسائل مع "الدفا"، رسائل بتخليه يستغرب لما يلاقي الأكل اللي نسيه على الترابيزة لسه دافي أو يلاقي هدمه اللي نسيها في سبّ الغسيل نشفت من غير ما ينشرها، وكان هو الوحيد اللي طول السنة بتبعث له "بطيخ"، ودي بوسة كبيرة ومُنْعِشَة مش بتبعثها الشمس للناس التانية غير لما يبقى شعرها طويل بس.

وفي يوم عدّت الشمس على الولد لقيته متضايق، لا عايز يتكلم معاها، ولا حتى افكر يحط لها القزاز الملون اللي بتحبه. قرّبت منه لقيته ماسك فستان أصفر بتاع بنت صغيرة، كان الفستان فيه قطع كبير من ناحية الظهر، وكان كل طرف من القماش قاعد بعيد مش عايز يصلح التاني ولا حتى يبص له، وكل ما يحاول الولد هو والإبرة الطيبة إهم يعدوا خيط بينهم كان كل طرف بيرمي الخيط بعيد عنه.

همس الولد للطرف الأول، وقال له:

- إنتوا بقالكُم قد إيه مع بعض؟

قال له:

- كثير.

قال له:

- يبقى ليه تخلي العشرة الجميلة دي تنتهي بسبب مسمار مزاجه وحش؟

وراح للطرف الثاني، وقال له:

- إنتوا بقالكُم قد إيه مع بعض؟

قال له:

- قليل.

قال له:

- يبقى ليه تخلي فرصة العشرة الجميلة دي تنتهي مع أول خناقة؟

كانت الشمس واقفة بتسمع الكلام ده ونفسها تتدخل بس مش عارفة إزاي، أخذت نفس عميق، قرّبت من الفستان بشويش، الطرفين بانوا أقرب والمسافة المخيفة بينهم بانّت أصغر.

مسكت طرفين القطع بإيديها، الطرفين نوروا من الدفا، واطرعشوا من الفرحة، مسكت الشمس خصلة منورة من شعرها، ومدّتها ما

بينهم، كانوا لسه بيترعشوا لدرجة إن ماحدش فيهم قدر يرمي طرف
الخصلة من عنده. مدّت الشمس خصلة تانية، وتالّثة لحد ما قرّبوا
الطرفين من بعض، وطلّت من بينهم خصلات الشمس زي شروق.

قال الولد:

- البنت حتفرح قوي بفستانها.

قالت الشمس:

لما يعجز الود.. استخدم خيالك.

زادت شهرة الولد في المدينة كلها، كان الناس بتجيب له الهدوم
المقطوعة اللي ماحدش قدر عليها، رغم وجود الود.

ماكانش بيغلب مع الهدوم اللي بألوان تانية غير الأصفر، مش بس
عشان كان عنده أصحاب كتير غير الشمس، لكن كمان عشان كان
اتعلّم الدرس.

مخلوقات أليفة

هو "مُهْنَدَم"، من سكان البيوت، ناس كثير بيعتبروه محظوظ، لأن الناس اللي متربية في البيوت بيعيشوا بشكل أحسن، أنعم وأريح.

بس ده مش حقيقي، لأن تربية البشر مسؤولية، ومش كل البيوت تقدر عليها. في بيوت غنية بتربي بشر كثير، بتحط لهم أكل غالي، وسراير دافية، ومن وقت للتاني بتفسحهم في جناين واسعة..

لكن بتفرض عليهم قواعد صارمة، أهمها النضافة والنظام ومعاملة الأغراب، وبتعاقبهم بقسوة لو كسروا القواعد اللي متدربين عليها..

لأنها بتقيس قيمة كل واحد فيهم حسب التزامه بالقواعد، ومن غير الالتزام ده بيتطرد من البيت مهما كان بيحبه.

وفي بيوت فقيرة يا دُوب قادرة تعيش، لكنها بترتِي بشر عشان
حنانهم يعوّضها شوية عن قسوة الدنيا. بيدبرّوا قمن أكلهم اللي دائما
بيكون بسيط، ويتفزعوا لما حد فيهم يمرض أو يغيب، كأنها قاعدة إن
المريض ما يبخفش والغائب ما يرجعش، ولما البشر ياخذوا راحتهم في
الحب، البيوت ما بتبقاش عارفة تعمل إيه، يا إما تقطع خلاصهم عشان
ما يخلّفوش، يا إما يضطروا يسرّبوا ولادهم عشان ما فيش مكان..
الاختيارين أصعب من بعض، كأنها قاعدة إن اختيارات الحب كلها
تقطع القلب.

الواحد من دول بينام على سرير، يصحى يلاقي نفسه تحت باط
العالم، فوق برميل مترّب أو تحت كوبري أو جنب شجرة.. ساعتها
بتطردهم البيوت كلها، بتطردهم، وبتخاف منهم لأنهم ممكن يكونوا
عنانين بوباء الحرية المُعدي، اللي بيخلي البيت يهرش، وحيطانه تُقع،
ويعشي في الشارع عريان، مش لابس غير عواميد خرسانة، وهوا
ساقع.

في الشارع ما فيش قدام البشر غير إهم يشتغلوا، فيه بيوت كثير
بتجمع بشر عشان يساعدهم في أشغالهم، زي البيوت اللي بتربطهم
في مكاتب لفترات طويلة، وبتضرهم بكراييج، وكروت فيزا، والبيوت
اللي بتجمعهم قدام شاشات كبيرة يفضلوا يتفرّجوا عليها بدون
توقف لحد ما وشوشهم تموت.

وفي بيوت ماعندهاش أي رحمة، بتدرّب البشر على حركات
بهلوانية، وبتحطهم في أقفاص، وتعمل لهم تذاكر بتزيد قيمتها حسب
خطورة الحركات اللي بيعملوها. بس مش بتديهم مقابل لده، لكنها
بتوعدهم بالمقابل في حياة تانية.

"مُهنّدم" يقول إن ناس البيوت بتجمعهم حاجات كتير، كلهم لما
يحبوا يزرعوا قلوبهم جنّين، بيحاوطوها بسور ويسقوها واحدة واحدة
عشان ماتغرقش، ولما يتعبوا بتنعشهم الممرات المخصصة للعجل، ولما
يناموا بتصحّهم أصوات خناقة الشمس مع الشبايك، ولما يخافوا
بيستخبّوا في الأقفاص، ويزعّقوا في وش بعض بجنون، يمكن يوصلوا
أسرع للحياة التانية اللي محوّشين فيها حياتهم الحالية.

هي "هوا"، من ناس البحر.. ناس البحر قليلين جدا في الدنيا،
وتبقى محظوظ لو قابلت حد منهم.. مش لأن البحر صغير أو فقير أو
ماقدرش يشيل مسؤولية، لكن لأنه صاحب مزاج، ومش بيرى غير
الناس اللي تقدر تستحمل جنانه.

هو صحيح غني جدا، أغنى من كل البيوت اللي في الدنيا، وعنده
أكل مش موجود عند حد، مخلوط بيود وحرية، أكل بيخليهم يكبروا
أسرع ويخلفوا أكثر ويحولوا أي فعل فردي لطقس جماعي، الحزن
والغنا والأكل والبرد والموت. لكنه في نفس الوقت عصبي جدا ممكن
ياكلهم لو اتكلموا معاه وهو متضايق.

البحر مش بيتهز لما حد من البشر يمرض أو يغيب، لأن عنده ملح
يكفي أوجاع الدنيا كلها، ولأن البشر اللي مريهم مايعرفوش
يتنفسوا بعيد عنه، ولا يستحملوا هوا المدن الثقيل الكتيب المطفي
زي برادة الحديد، وطول ما هما بعيد بيقوا شايلين أسطوانات مليانة
بها البحر على ضهرهم لحد ما يرجعوا.

ناس البحر كمان بتجمعهم حاجات كتير، كلهم لما يجوا بيفردوا
قلوبهم شراع، مش بيسألوا هوا جاي منين ولا رايح فين لكن بيمشوا
معه، ولما يتعوا بينعشهم ملمس النجوم على حدودهم، ولما يناموا
بتصحيهم ريحة الغنا المتخزن في الصناديق، ولما يخافوا بيستخبوا ورا
شبايك مدورة تحت مستوى البحر، كأن إيد البحر الزرقا ضمت
صوابها عليهم، وماحدث يقدر يوصل لهم هنا.

إنت "زين"، من ناس الصحرا.. ناس الصحرا كمان قليلين جدا
عشان الناس عادة بيهربوا منها، الصحرا بتعامل الناس بقسوة، بتديكم
أكل ناشف، وسراير خشنة، وأحلام باهتة.. ماحدث عارف ليه
بتعاملكم كده، يمكن عشان تتصاحبوا عليها بسهولة، ويمكن عشان
ماتعرفوش تبعدوا.. الصحرا عارفة إن اللي بيتعود على قسوة الريح
اللي بتضره بالحزام بسبب، ومن غير سبب، بيخاف من حُضن
الحيطان، وطبطة الستائر، واللي كانت هديته لأول بنت حبتها..

صبار، مش حيفهم الورد اللين اللي بيتكلم بصوت واطي،
ويموت لو ماحدث سأل عليه.

ورغم معاملتها دي، عندها طريقة تروض بيها أي حد، مزيج من شهوة الموت وخوف الحرية، طريقة بتخلي الواحد منكم أكثر شراسة من دوامات البحر، وأكثر وداعة من عتبات البيوت. إنت بس بتسيب لها نفسك، وبتصدّقها، وهي بتخليك تطفو. جسمك بيخف، كل قوائم الطلبات، والمشاورير، والأسماء اللي كتبتها في حياتك بتتخلع واحدة ورا واحدة زي أوتاد الخيمة في الريح. عشان كده اللي بيكمل فيها فترة معينة من غير ما يهرب، بيصحى في يوم يلاقي نفسه بيقدر يزغزغ الرجلين زي الرمل الناعم، وبيقدر يققع العيون زي الرمل الناعم.

ناس الصحرا - ورغم إنكم ماتعرفوش بعض، لكن فيه حاجات بتجمعكم، كلكم لما تحبوا بتطلقوا قلوبكم ديابة، مش بتندي لكن بتختبر شجاعة اللي قدامها، ولما تتعبوا بينعشكم الونس بالعدم، ولما تناموا بتصحىكم صفارة الليل، ولما تخافوا بتستخبوا في أكثر مكان مكشوف، عشان قلوبكم الديابة تقدر تدافع عنكم.

أنا "حكيم"، من سكان القمر. حستغربوا طبعًا لأنكم عارفين إن القمر مش بيرتي حد، وكلكم عارفين الحدودة المشهورة لما فكر مرة يرتي واحد من البشر. وقتها أول ما شاله لقاه لابس بدلة متوصل بيها خراطيم غريبة، وخوذة قزاز، ويحرك أطرافه بصعوبة، ولما شال الخوذة من على دماغه عشان يلعب معاه لقاه بيص له بنظرة خوف

ووشه بقى أزرق، هو إيه اللي ممكن يخلّي وشك أزرق لما تبص لحد
يحبك من غير قرازا؟!

من ساعتها والقمر، بيسلم على البشر من بعيد، بيعدي على
البشر في الأقفاص يسيب لهم أكل، ومياه، ويعدي على البشر في
البحر، والصحرا يحضنهم، ويلعب معاهم. لحد ما في يوم اكتشف
القمر طريقة لعلاج الوش الأزرق، وبدأ تربية البشر. المسألة كانت
بسيطة جدا، هو مش محتاج أصلاً يشتري البشر في أقفاص حديد
مقفولة كويس، وعديمة الجاذبية عشان مايهربوش، كفاية إنه يربطهم
بخط السرحان. السرحان خلانا نقدر نبص للقمر لمدة طويلة من غير
ما وشنا يزرق، وخط السرحان لأنه طويل جدًا خلانا نتحرك
براحتنا من غير ما نتوه في الكواكب الكثير اللي شبه بعضها، ومن
وقت للتاني بنرجع الأرض عشان نخكي حاجات، ونخبي حاجات،
وبكده نفضل فاكرين لفتنا القديمة.

ناس القمر- ورغم إننا نعرف بعض كويس، لكن فيه حاجات
بتجمعنا. كلنا لما نحب بنخبط قلوبنا نياذك في اللي بنحبهم، ولما نتعب
بينعشنا حضن الشمس ساعة الكسوف، ولما ننام يبصحننا صوت
فرقة البالونات في خيالنا، ولما نخاف بنستخى في أي أغنية تافهة
بتكلم عن القمر، عشان عارفين إن ده آخر مكان ممكن تلاقي فيه
ناس القمر الحقيقيين.

مهندم، هوا، زين، حكي...

إحنا الأربعة تايهين في حدوده، ومش عارفين نرجع.

الشوارع

في نهاية كل يوم بعد ما يروح آخر واحد ماشي، الشوارع هي
كمان بتروح عشان تستريح.

بتروح مكان واسع وتقعّد، تمّدّد، وتلعب برجليها في الرمل، ومنهم
اللي بيترّل البحر عشان يريح جسمه المهدود من شيل الناس،
والعربيات، وسند الشجر، والبيوت طول اليوم.

الشوارع الكبيرة أول ما بتوصل بتقلع أنوارها العالية، وبتديها
للشوارع الصغيرة، والحواري عشان يلعبوا بيها، وبعدين بيحطوا
سماعات في ودانهم ويسمعوا مزيكا هادية عشان يستريحوا من
الدوشة، أو ياخذهم الكلام مع بعض عن اليوم كان شكله إيه، عن
المظاهرات الكبيرة والطواير والحناقات وقفلة المرور لما العربيات كلها
تتلخبط مع الاتجاهات، والبشر في النصّ باصّين لبعض بعجز، عجز

يدل على إهم قد إيه كائنات تعيسة مش عارفة حتى تحافظ على برّاح
عشان حاجة تعدي.

أما الشوارع الصغيرة فيقععدوا يرغوا كتير عشان كانوا طول
اليوم مش لاقين حد يتكلموا معاها، حتى الناس اللي بيعدّوا غالبًا مش
بيصوهم، ولا بيستّوا عشان يسلمّوا عليهم.. لا ييمشوا على طول.

ماحدش أبدًا كان يعرف الموضوع ده، لحد ما في يوم نزلت بنت
بالليل عشان تشتري شمس صغيرة من عند بيّاع الشمس، عشان
أخوها كان عيّن، ومحتاج نقل نور، والدنيا ليل، والشباك نايم.

نزلت عند باب العمارة واستغربت قوي، هي كانت أول مرة
تزل فيها بالليل كده، ومالقتش ولا شارع، قعدت تبص يمّين، وشمال
مالقتش، وبعيد خالص كان في شارع صغير خالص، يا دوب يعدّي
واحد قلبه كبير أو اتنين ماسكين إيد بعض.. شاورت له من بعيد
فابتسم قوي، وساب السحابة اللي كان بيقرأ فيها وجه ناحيتها، قال
لها:

- إزيك، إيه اللي نزلك متأخر كده؟

قالت له:

- الشوارع راحت فين؟

قال لها:

- بتستريح من الشغل، وبتأخذ دُش من التراب.

قالت له:

- طيب أنا عاوزة أروح لبّاع الشمس عشان أخويا عيّان.

هرش الشارع في الخطوط البيضا اللي في راسه، وقال:

- هو مش هنا، لازم تعدّي شارعين عشان توصليله، بس هُما أكيد مش حيرضوا يصحوا دلوقتي.

سألته:

- هُما مين؟

قال لها:

- أنا ممكن أودّيك بس ماتقوليش لحد، عشان أنا حانتحل شخصيتهم، وهما ممكن يزعلوا.

البت صقّفت بإيديها، وقالت له:

- إنت شارع حلو قوي.

وراح مسك إيدها ومشوا.

طول الطريق كان الشارع الصغير بيحكى لها عن البيت الكبير على البحر اللي بتستريح فيه الشوارع بعد كل يوم، وكان يقول إنه لما بيروح ييحب قوي يحط الصدفّة في ودنه، ويسمع، وبعدين يحطها على بُقه، ويتكلّم، وكأنه بيتكلّم مع البحر ع التليفون، ويقعد يحكي

هو عمل إيه النهارده. البنت ضحكت قوي لما قال لها إن البحر رد عليه مرة "ها وبعدين"!!

البنت مشيت هي، والشارع الصغير، وكان كل شوية شباك أو إشارة مرور تسلّم عليه، وتناديه باسم الشارع اللي مُنتحل شخصيته، فيسلّم عليه جامد، وكأنه يعرفه.

البنت كانت بتكنم ضحكتها بصعوبة، وبعد ما تمشي شوية بعيد تضحك كتير بصوت عالي.

البنت جابت الشمس وروّحت البيت، وقفت عند الباب وقالت للشارع الصغير:

- إنت شارع شاطر قوي، ممكن أسألك سؤال:

هو إنت ليه مارُحتش معاهم عشان تستريح؟

قال لها:

- عشان في يوم عدّت عليّا بنت حلوة لقتني ساكت، راحت جابت رواية، وقعدت جنبي تقرا بصوت عالي وتضحك قوي. ساعتها فيه بيّاع ورد عدّى إداها وردة وقعد جنبها، وبعدين بيّاع جرايد وسحابة ويمامتين، ومن ساعتها وأنا حاسس إني دافي قوي ودائمًا الحاجات بيعدّوا عليّا، ويسلمّوا وتُقد نفكر القصة، والبنت الحلوة. فقلت أفضل مكاني يمكن تحب تُخُرج بالليل تلاقني حد يوصلها.

الشارع سلّم على البنت، ورجع مكانه، وسأها فتفكر براحتها.

لُغة بتحفظ توازُن العالم

لما دخلت الجامعة، اخترت كلية الألسن، برغم إن مجموعي كان
يجب كليات ثانية زي كُلية الطبطة، أو كُلية قتل الملل، أو حتى
كُليات القمة زي كلية "الاستهزاء بالفن"، اللي بتطلّع الوزرا،
وعساكر المزلقانات، وصوائف الشاي الألومنيوم.

بس أنا حببت الألسن، مش عشان بيتعينوا بدري، ولاّ عشان
بيقدروا يحولوا أي لحظة لفيلم أجنبي لكن لأنهم قالوا لي إن اللغات
الجديدة بتشفي أوجاع اللغات القديمة.

في أول يوم كان الطلبة ييلقوا بين الأقسام، أغلبهم كان عارف
بالظبط هو عاوز إيه. منهم اللي كان عاوز يتعلّم لغة الزراف عشان
يقدر يشوف الدنيا من فوق، واللي اختار لغة القبيلة عشان ماحدّش

يقدر يحضنه، واللي اختار لغة التماسيح عشان يشيل الديدان اللي بين
سنانه، واللي اختار لغة السلمون عشان يسافر وهو مش ندمان. بس
أنا لسه ما كنتش عارف أنا عاوز إيه. أنا كنت محتاج كلام يبقى ماشي
معايا يحميني من الكلام المسعور اللي برّا.. الكلام اللي بيصرخ في
وشي من جنب الطريق وأنا معدّي، أو يُقع عليّا زي المهدوم المبلولة
من البلكونات، أو بيستّاني، وأنا ماشي لوحدي جوّا فكرة مهجورة،
ويرفع عليّا السلاح، وياخد كل اللي معايا، ويعدين يسييني لوحدي
في الفكرة دي مش عارف أرجع. كنت باسمع كمان عن ناس عايشين
حياة أصعب، الدنيا فيها يتمطر كلام كتير يفرّق شوارع بحالها، ويخلّي
الناس مش عارفة تمشي، ولا حتى تفتح الشبابيك، ولما يجوا يتكلّموا
يلاقوا بُخار أبيض فاضي هو اللي طالع، وناس في أماكن تانية بتخطّ
الكلام في بنادق، ويقعدوا يضربوا بعض بالسنين.

لحد ما خدت بالي من بنت واقفة لوحدها، قُدّام قسم سرطان
البحر. كانت لابسة بدلة رمادي، وكان شعرها بيطير، قلت لها:

- صباح الخير، القسم ده فاضي ليه كده؟

بصّت لي، وقالت:

- الناس ما بتحبش اللغات اللي بتاكل، فتخيل بقي، السرطانات
بتسلق وهي حية.

سألتها:

- طب وإنت، اختاري القسم ده ليه؟

قالت لي:

- عشان ما أديش قلبي إلا للي يعرف يفهمني كويس. ماكانتش بتبص لي ساعتها، بس كانت مخنوقة جدًا للدرجة إني خُفت تسألني نفس السؤال.

أنا وهي كنا الوحيدين في القسم ده للدرجة إننا كنا بناخد المحاضرات على ترايزة في الكافيتريا، أو في حلم واحد فينا. كان السرطان اللي بيدرس لنا مثقف قوي. ماكانش متضايق إن كل أستاذ كان يمشي في الكلية ووراه طلبة كثير ما عدا هو، كان يبحب لغته، ويقول إنما بتحفظ توازن العالم، كان كمان قاري قصايد كثير بلغة البشر، وكان يترجها بالرقص. في رقصة للقصايد اللي فيها وحدة، ورقصة للقصايد اللي فيها مرح مش مفتعل، ورقصة لقصايد التصالح مع العدم، ورقصة لقصايد الشهوة اللي مابتكسفش.

وأيام العملي كان يودينا البحر، كنا بنحط سماعات في وداننا، وندفن طرفها في الرمل، ونستنى السرطانات تعدّي، كان الأستاذ يقول لنا:

- ركزوا في خطوطهم، السرطان بيمشي كأنه بيرقص، عشان كده خطوته لغة، لكن البشر خطوطهم مجرد دوشة، طاقة مهكرة وخلاص. ولما بيكون فيه زحمة باشوفهم كأنهم موتور كبير بيلف ع الفاضي.

في مرة سرطان وقف فجأة وبص لنا، وقتها كل السرطانات
وقفت هي كمان، رفعنا أيدينا لفوق من غير ما نحس، رفع مخالبه
لفوق، ضحكنا من السعادة، لقيناه سابنا، وجري دخل تاني جوا موج
السرطانات ومشوا. ساعتها قلت لزميلتي الوحيدة:

- عارفه أنا اخترت القسم ده ليه؟، عشان لما شُفّتك لوحذك
قلت ماينفعش القسم ده بالذات يبقى فيه طالب واحد، لازم حد
يفهمه ويتكلم معاه.

رفعت أيديها لفوق، رُحت رقصت معاها رقصة قصيدة مترجمة
كنا اتعلمناها إمبراح.

يوم التخرج كان أجمل يوم ليا. كان الطلبة كلهم قاعدين في قاعة
الاحتفالات، وكل واحد يندهوا على اسمه يطلع على المنصة، والعميد
يفك راسه زي اللبنة ويحط مكانها اللغة اللي اتعلمها، ما عدا إحنا
اللاتين، أخذوا رجلينا وإدوا كل واحد منا 8 رجلين، ومع ذلك
عرفنا نتصور معنهم الصورة الجماعية المعتادة بتاعة حفلات التخرج،
وكل واحد رمى راسه البشرية، وطوّحها لفوق في وقت واحد.

ولما خرجنا من الكلية يومها، كنا لسه ما اتعودناش على شكلنا
الجديد، عشان كده كنا بنستغرب لما الناس تبص لنا بعدائية، وكلامهم
الغريب يصرخ في وشنا وإحنا ماشيين، أو يحبطنا كأنه مش واحد
بale. وقتها زميلتي الوحيدة كانت خائفة جدا، لدرجة إنها طلبت مني

نرجع الكلية تاني، أو على الأقل نفضل مع بعض شوية قبل ما نروح
عشان ماتبقاش لوحدها في الموتور الكبير ده، وحسّت إنها ارتكبت
خطأ كبير، وإنها ماكانش لازم تدخل الكلية دي من الأول. قلت لها:
- بالعكس، على الأقل إحنا عُمرنا ما حنحُط كلامنا في بنادق،
ونضرب حد.

حواديت المطر

المطر بص لأمي بدهشة، وسعادة كأنه طفل أصل دي أول مرة
حد يسأله عن أمه!! المطر شااور لها، وهو لسه مستغرب على السحابة
الكبيرة اللي فوق الجنية، لحسن الحظ ماكانتش بعيدة. أول ما وصلنا
الجنية للممت أمني طراطيف فستاها يايدي، ومسكت إيدي جامد بالإيدي
الثانية، وشاورت لسواق تاكسي وإدت له ضحكة من القلب، وطلبت
منه يوصلنا لفوق، السواق إداها ابتسامتين صغيرين "الباقى"، وطلع
بيننا. السحابة الكبيرة فرحت بينا جدًا، وعزمتنا على شاي، وورّتنا
أجمل حنة فيها ممكن نشوف منها المدينة كلها، وهي متغطّية بالبُخار،
ونقط المياه الصغيرة. أمني حكّت لي بعدها إنها كانت ناويه تعمل ده من
زمان عشان نلعب مع البعض أنا، والمطر ونبقى أصحاب. أعلمه إنه
يفغي لو عدى على بيتنا أو لمس ورق أخضر أو شعر بنت صغيرة،
ويعلمني إني أبقي فرحة صافية، وأخلي الولاد والبنات أول ما يشوفوني
يفغوا، ويحضنوني جامد وأول ما أمشي أسيب ورايا نور.

B for Blogger

بُص يا طاهر، أنا عارف إنك عاوزني أحكي لك حدوتة "طاهر" دي، بس أنا عاوز أحكي لك حدوتة تانية.

زمان قبل ما ندخل الدولار ده. كانت الدنيا اللي عايشين فيها أوسع بكثير، كلن كل واحد عنده بيت كبير حواليه جنية، مساحة شبهه، مرتبطة بيه، لأنه هو اللي بيديها اسمها، وهو اللي يبسقيها كل يوم عشان تفضل عايشة، وهو اللي بيغير في شكلها عشان تبقى شبهه أكثر. عارف إنك حتقعد تبص للرف الصغير اللي إحنا قاعدين فيه ده وتستغرب، اسمعني بس، أصلك ماشفتش.

في يوم أنا كنت قاعد على السفرة في البيت، وماسك الملاحه، وباهزها جامد، بس ماكانش فيها ملح. اتخضيت قوي، رحت على المطبخ أدور في كل الرفوف، أدور بسرعة، وبعدين أدور تاني واحدة واحدة، بس اللي كنت خايف منه حصل، مالفيتش ملح خالص.

وقتها اتسندت على الباب، وأنا خايف أقع، كنت تعبان قوي، وحاسس يبرد للدرجة إن جسمي بدأ يصغر، الحيطان بانّت واسعة واللمبة بقت بعيدة. خرجت من البيت أدورّ على ملح، كل الغلات كانت قفلت، وكل الناس كانت قافلة الشبابيك وماعندهاش ملح. لحد ما لقيت بنت قاعدة تحت شجرة، كانت بتبتسم ابتسامة واسعة قوي، ومتطمّنة كأن العالم ده ابنها اللي لسه مولود من دقيقة، ونايم على دراعها. البنت كانت ماسكة إبريق صغير، وبتصّب لنفسها شاي أخضر، أول ما بصت لي لقيتني أنا كمان بابتسم، قالت لي:

– تعالى اشرب شاي معايا.

قعدت، مش عشان كنت لسه تعبان، لكن عشان البنت دي فيها حاجة بتخليك تحس إنك لازم تقعد شوية. اتكلمنا كثير، وشربنا شاي أخضر. قلت لها إني مابقاش عندي ملح، وإن أنا عمري ما فكرت إني حاواجه المشكلة دي، وأنا لسه في السن ده.

البنت قالت لي:

– بالعكس، إنت كبرت على إنك تخاف من طعم الحاجات.
"هاجر"، أنا اسمي "هاجر".

وقتها لقيت حرف B نور في الهوا فوق راسها. استغربت قوي، للدرجة إني ماقدرتش أسألها إيه ده، بس هي مسكت إيدي بشويش، وغلّتي أدوس على الحرف ده، لقيته اتحوّل فجأة لشباك كبير مفتوح، شباك كبير للدرجة إنه ممكن يعدّي حلم أو سفينة كبيرة أو أتوبيس ملايكة.

اكتشفت إن هاجر كانت لسه ماسكة إيدي لما سحبتني معاها، ودخلنا من الشباك.. جواً الشباك كانت دنيا تانية، كبيرة وواسعة، مليانة جنائن بس مش كلها لونها أخضر، كان فيه نجيل بكل الألوان، كأنهم حاسين إن كل الألوان ممكن تحسّسك بالأمان لدرجة إنك تخليها خلفية للعالم بتاعك.. أيوه طبعاً، الناس هناك كانت مختلفة عن هنا، كانوا أقوى بكثير، كانوا يقدرُوا يحركُوا الحاجات حوالِيهم زي ما هما عاوزين، من أول السكر اللي بيلعب استغماية مع النمل لحد الكواكب الصغيرة اللي بتدور حوالين الناس الكبيرة اللي بتحكي حواديت.. مش مصدقي؟!.. أنا بنفسِي شُفت النهر اللي بيعدي كل يوم الصبح بالعجلة بتاعته عشان يسقي الورد، ويمسح قزاز الشبايك، والونش اللي بيعدي عشان يشيل الأحلام العطالانة اللي سادة الطريق، والترزي العجوز اللي بتدي له اللحظات الحلوة عشان يفصلها على مقاسك، وبياعين البرايز والنعناع والتليفونات أم قُرص، وكان فيه البنات اللي بتبيع خلاخيل المزيكا، مش عارفها؟ دى خلاخيل لما البنت تلبسها في رجلها الشمال بتبقى في خفة المزيكا، تُتْط من قلب الولد ده لكُتف البنت دي، ومن كاسيت العربية دي لصفحة المدونة دي. طبعاً ماكانش الناس كلهم سُعدا، ولا شكلهم حلو، بس كانوا حقيقيين قوي، كأنك ما شُفتش بشر في حياتك قبل كده. حاولت أتكلّم مع حد منهم لقيت هاجر شدتني ناحيتها، ضمت صوابها زي القُرطاس، وحرّكت إيدها فوق، وتحت "لسه شوية".

ابتسمت تاني، كل واحد في الناس دول كان فوق راسه حرف B طائر في الهواء، وكانوا بيتعرفُوا على بعض بطريقة غريبة جداً، كل

واحد كان يقرّب من الثاني، ويدوس على الحرف اللي فوق راسه، ويقعد يُصّ له شوية، وبعدين يا إما يتسم قوي وياخده بالحُضن، يا إما يعيِّط ويفضلوا هما الاتنين ساكتين، يا إما يهز راسه يمينا، وشمال، ويسلم عليه، ويسيه، ويمشي.

هاجر حكّت لي كمان إن لما يزيد عدد الناس اللي بياخدوك بالحُضن، بتبقى عندك قُدرات خارقة، وقعدت تحكي لي عن ناس كثير تعرفهم وصلوا للقُدرات دي، زي رحاب اللي بقت بتزرع ورد في كفوف الناس لما تسلم عليهم، ومحمود اللي بيركّب عيون صناعية للتماثيل واللوحات عشان تُبص لنا هي كمان، وتحب الجمال اللي فينا، وأحمد اللي بيحوّل البيّاعين السريحة لدونالد داك، وغادة اللي بتعمل بيوت، وشجر، وكتب من الكروشيه عشان الناس ماتضطّرش تلبس هدموم كثير في الشتاء، ومنى اللي بتحوّل بالليل لزرافة بتمشي في الشوارع الهادية، وتدخل رقبته في الكافيهات عشان تشم ريحة النسكافيه.. يومها مشينا كثير قوي أنا، وهاجر، كنت بابص على الأماكن اللي حواليا، وبقول لنفسي لو أنا عاوز يبقى ليا مكان هنا، ممكن يبقى فين؟ لحد ما شفت برج حمام بعيد، وحمام كثير طالع، وداخل في الفتحات بتاعته طول الوقت كأنهم أفكار في عقل واحد، والسما من فوقه صافية وواسعة، وكل ما حمامة تخرج أو تدخل كانت ألوان السما بتتغير.

مشينا لحد ما وصلنا له، ساعتها هاجر بصت له كثير قوي، وبعدين قالت لي:

- طيب، بس إوعى تسبب الحمام من غير أكل.

وعندما فرجعت تبتسم تاني، عرفت بعدها إنها بتخاف على الحمام من الناس اللي بتيجي جديد لأنهم بيفتكروا الدنيا دي فُسحة، وخلاص.

رجعنا نمشي لحد ما وصلنا لمكان واسع مافيهوش حد، مافيهوش غير صواعق ناموس كتير مرصوفة جنب بعضها، حسيت إن إيد هاجر بقت ساقعة، وصوقا بقى أوطى وهي بتقول لي:

- دول الحُرَّاس اللي بيحموا الدنيا.

سألته:

- بيحموها من مين؟

بصت لي، وقالت:

- من الناس اللي جايه من الدولاب الأزرق الكبير.

وبعدين بصّت حواليتها، وقالت لي:

- يلا نرجع.

رفعت إيدي تاني، وداست على الحرف اللي فوق راسها، الدنيا اختفت، ورجعنا تاني قاعدين قدام الشجرة وإبريق الشاي.

كُنت لسه مبهور، ومش مصدّق إن كل ده حصل فعلا. سألته:

- أُمال إنتي إيه القُدرة الحارقة بتاعتك؟

ابتسمت قوي، وقالت لي:

- أنا باعمل شاي أخضر.

هاجر إدتني مراية صغيرة، بصيت فيها لقيت حرف B زي اللي عندهم بالظبط، كنت مبسوط جدًا كأني لسه مولود من دقيقة.

قالت لي:

- عشان تعرف تيجي بعد كده. وبعدين رفعت إيدها، وداست الحرف بتاعي، بصيت له شوية، وهي بتبتسم، كانت عينيها جميلة، وهي بتتحرك كده، وكنت حاموت، وأعرف إيه اللي هي شايفاه دلوقتي، وفجأة حصنتني جامد كأنها بتشط في البحر.

لحظتها اتغير لون النجيل بقى بألف لون، والبيوت البعيدة اتحوّلت لنوارس، وطارَت في الهواء، وكان فيه مزيكا ناعمة كثير بتقع عليّا، وتندرج لحد ما تقع على النجيل. قلبي كان بيجري بسرعة كأنه مش قادر يحفظ كل ده، وجسمي بقى خفيف، خفيف لدرجة إني حسيت بالنور وهو بيعدي جوايا، بصيت لفوق، كان فيه فراشات كثيرة جدا مالية السما، طارت فوقنا شوية وبعدين اختفت.

وقتها كنت نسيت جسمي خلاص ومابقيتش أفكر هو فين وبقي شكله إيه.

أنا بس سألت هاجر:

- هما الفراشات راحوا فين؟

قالت لي:

- لما حد يدوس على الحرف بتاعك، حتشوفهم في عينيه.

فيما يرى القاعد بين الصحيان والنوم

المحطة ماكانش فيها غيرنا، أنا على رصيف "النوم"، وهو على
رصيف "الصحيان" الناحية الثانية.

قعدنا نبُص لبعض، قلت له:

- عندنا وقت، تيجي نبَدِّل؟

قال لي:

- مش حتخاف؟

قلت له:

- لا، أنا من زمان نفسي أصحى.

قعد يفكر شوية، وبعدين قال لي:

- طب ولو ماعرفناش نرجع؟!

قلت له:

- ساعتها نبقي نخاف.

وفعلًا لما جُم القطرين بتوعنا، كل واحد ركب مكان التاني.

أول حاجة استغربتها كانت المسافة، بعد ما عدت فترة، وأنا جواً
القطر حسيت إني زهقت، حاولت أشد المسافة شوية عشان أوصل
أسرع، ماعرفتش، وبعد شوية لقيت فكرة حلوة جات قعدت جنبي،
فقلت أطول المسافة، بس لقيتها مثبتة في القطر بمسامير حديد، لا
بتزيد ولا بتقل، ومكتوب عليها "صنع في الزهق".

كانت أول مرة أشوف مُنتجات الزهق، وبدأت أحن للقطورات
بتاعتنا اللي كانت بتتفك وتتركب حسب ما إنت عاوز، والمسافات
اللي بتختارها من البوفيه زي ما بتختار قهوتك.

بعد ما وصلت لقيت ناس كتير على الرصيف، استغربت إنهم
كانوا كلهم شبه بعض، كأنهم نقط مطر مالهش لون، أو نغمة واحدة
بتكرّر زي الجرس، حطيت أيديا على وداني من غير ما أحس، عارف
يعني إيه تلاقي جرس بيدق حواليك طول ما إنت ماشي، ولو غمضت

عينيك أو غطيت ودنك بتحسه ماشي تحت جلدك. الناس دي عايشة
كده إزاي؟!

فكرت إنهم أكيد هنا كل واحد بينام في أوضة لوحده، ولما يبقى
مستني حد في المطار بيشيل يافطة باسمه عشان يعرف يلاقيه، وسألت
نفسي يا ترى هما يفضلوا كده كل يوم؟!، ده يبقى جسيم، الواحد
عندنا مايقدرش يعيش من غير ما يغير شكله بين فترة والثانية، مرة
يقي فهد إسود، ومرة يقي عصفور كناريا، ومرة عوامة بحر، ومرة
كرسي أرابيسك.

يا ترى حاقدر أقعد لبكرة عشان أشوف هما حيقوا إيه، ولا مش
حاستحمل البعد عن أهل المدينة بتاعتي، الملونين زي أنوار الملاهي
وزي خروشة محطات الراديو اللي مش مطبوعة؟!

فضلت ماشي وسط رنين الجرس ده، بنفس الطريقة كانت البيوت
كلها مبنية لفوق، مافيش بيوت مموجة زي البحر، ولا بيوت طالعة
دواير في الهوا زي فقايع الصابون كل الموبيليا خشب، مافيش
كراسي من الفاكهة أو سراير من رغوة النسكافيه. كل المحلات منورة
كأن مافيش حد محتاج الضلمة عشان يختار حتى الجوامع كلها بتشاور
لفوق كأن الإله مش موجود غير في السما.

قعدت على الرصيف، وأنا بأبص على الشارع قدامي، كل
البطلونات زرقا أو سودا كأنها مجموعة أقلام على مكتب موظف

أرشيّف، مافيش رجلين بتكلم مع بعض عن أي حاجة حتى لو بتسأل عن الطريق. مافيش عربيات مش بتدخن أو بتحب المصاصات مثلاً.

حتى لما تعبت ورحت أدور على مكان أبات فيه، سألت عن فندق على شكل عقل عشان أناام وسط الأفكار، قالوا لي إن الفنادق هنا عبارة عن أوض مكعبات وبس. وقتها شفت البشر كأنهم عيانين بوباء غريب، يا ترى الوباء ده جه منين، وإزاي قادرين يعيشوا معاه.

ماكانش قدامي غير إني أحاول أرجع بأي شكل.

روحت صيدلية عشان أشتري تذكرة، لكن الصيدلي قال لي إن الأدوية المنومة كلها خلصت.

خرجت، وأنا مش عارف أعمل إيه؟! الجرس لسه بيرن تحت جلدي، فكرت إن تذاكر النوم دي هي الحاجة الوحيدة اللي ليها علاقة بيّنا، يبقى أكيد شباك التذاكر هو كمان له أشكال كتير.

فضلت أمشي وسط الناس، وأنا بافكر يا ترى أنا لو عملت شباك تذاكر حاعمله فين؟ خاصة لو مش عاوز الناس العيانين بالوباء يوصلوا له؟؟ دورت في المزيكا النشاز، وجيوب الهدوم اللي مش مكوية، وتحت الشجر اللي مش بيتحرك ضله مع الشمس، وفي شنتط الولاد اللي مش بيعيطوا وهما رايعين المدرسة. كنت طول الوقت باهرب من الكلام مع الناس، باخاف من ريحتهم وأكلهم ومطارح خطأويهم، ماكنتش عارف العدوى ممكن تيجي منين.

كان لازم آخذ بالي من المطاعم اللي بتقدم وجبات الخيال السريعة، اللي بيشغل فيها الشعراء، والرسمين، والممثلين، أصلي سمعت إهم ممكن يبيعوا لك تذاكر مزيفة مفعولها يخلص بمجرد ما تخرج، لأن التذكرة اللي توديك مكان تاني لازم تكون معمولة عشانك إنت بس.

كمان كان لازم آخذ بالي من مصايد الفوضى، اللي ممكن تكون عبارة عن بلاعة مفتوحة أو بيت شايل أدوار زيادة أو عربية ماشية عكس الاتجاه. حذرونا قبل كده إن الحاجات دي مش تذاكر خيال لكنها تذاكر عدم، ويحطوها للمتسللين اللي زي عشان يقعوا في العدم، أو يفضلوا خايفين منها وياخدوا العدوى عن طريق الخوف.

النهار بدأ يمشي، توقعت إن الدنيا حتضلم بحكم العادة أو بسبب فقر الخيال.

كنت خايف من الضلمة كأنها امتحان، لو ما قدرتش أشوف في الضلمة ممكن يكون ده معناه إني أخذت العدوى، ومش حاعرف أخرج من هنا أبدا.

وقفت قدام صالون حلاقة، كان جواه راجل عجوز إيديه بتترعش لما بيتكلم اسمه عم فايق. الراجل ده كانت شغلته إنه يُقص الخيالات الزائدة، ويسرّحها بحيث تكون شبه فورمة معينة.

كان عنده 12 فورمة، والزبون بيختار واحدة منهم وبعدين بيص لتحت ويسيب عم فايق يشتغل. كان من المنطقي إن ده يكون آخر

مكان ممكن أدور فيه، بس أنا قلت إني - لنفس السبب ده - كنت
حاحي شباك التذاكر بتاعي هنا. قعدت على الكرسي مستني دوري،
فضلت أتفرج على ال 12 فورمة اللي بيوزعهم عم فايق على أهل
المدينة كلهم، فورمة التفاوض الساذج والتعب اللذيذ والمشاعر
المتضاربة والخوف من الاستعجال والضحك من غير نفس وكآبة
اللحظات الحلوة. قعدت أفكر حافتح معاه الكلام إزاي؟!

لما جه دوري قعدت على الكرسي قدامه، حط ال 12 فورمة
المرصعين في دايرة قدامي عشان أختار.

ابتسمت وقلت له:

- مش بافكر في حاجة معينة.

قال لي:

- تحب أختار لك واحدة منهم؟

قلت له:

- لأ، اعمل اللي بيعجي على بالك. فاجتني.

وقف عم فايق مستغرب، وقعد يبص لي كتير، وهو مش مصدق.
بعدين مشى الزباين كلهم بحجة إن التكييف عطلان، وقفل الباب
وطفى كل أنوار المحل، ولما لقاني لسه شايفه في الضلمة قال لي:

- إنت عرفت مكاني إزاي؟

قلت له:

- أنا كنت بابص على الناس طول اليوم، ومع إن مافيش غير ال 12 فورمة دول، لكن كان دائماً فيه تفصيلة صغيرة بتفرق كل واحد عن التاني، ممكن الفرق ده يبان لما الواحد يضحك أو يتعصب أو يحب، ممكن يبقى مؤقت وممكن حتى ماياخدش باله منه. حسيت إنك بتبوظ شغل الصحيان، أو بتوجه رسالة للناس اللي بتحاول تنام.

قال لي:

- إنت أكيد كنت نائم.

قلت له:

- أيوه.

سألني:

- وجيت هنا إزاي، اللي أعرفه إن اللي يجرب النوم مش بيحب يصحى تاني.

قلت له:

- دي قصة طويلة. إنت بقى ماحاولتش تقرب من هنا ليه؟

قال لي:

- أنا حاولت أعمل أكثر من كده، أنا شاركت في الثورة، كنا مجموعة كبيرة قوي، وطالبنا بصلاحيات للنائمين في الرقابة على سلطة الصحيان، وكان أول مطالبنا الحق في العلاج، يان ييقى عندنا شباك تذاكر مفتوح للناس كلها.

قلت له:

- وبعدين؟!

قال لي:

- هجموا العساكر علينا، وضربونا بقنابل خيبة الأمل، وبنادق المعادلات الحسابية الصعبة، ناس كثير استسلمت، وناس كثير اتصابوا حواليا، وبقوا صاحيين للأبد، واللي حاولوا يهربوا وقعوا في مصايد الفوضى اللي كانت محاصرةانا، ماحدش فضل غيري، عشان صعبت على عسكري فشالني، وأنا مُصاب، ورماني في مكان بعيد، ومن ساعتها، وأنا باحاول أساعد الناس يهربوا.

سألته:

- وساعدت ناس كثير؟

ابتسم، وقال لي:

- أيوه، بس في الحقيقة كلهم عرفوا مكاني من العسكري ده.

إنت أول واحد يكتشفه لوحده. عشان كده كنت خايف، وقتها أنا كنت متلخبط، ومش عارف أعمل إيه.

عم فايق كان بيُص لي، وعينيه فيها أمل مكتوم، ما اعرفش هل
كان حاسس بده فعلا، ولا كان بيمتحن قدرتي على قراية العيون.

كان عجوز جدّا، وإيده كانت بتترعش مع إنه دلوقتي مش
بيتكلم، كان واضح إن ده شباك التذاكر الوحيد، ولو اتقفل ماحدش
حيقدر يهرب من هنا. عدت فترة سكوت طويلة، ماكانش فيها غير
صوت الجرس اللي برّا، اكتشفت إنه مابقاش بيدمر أعصابي زي ما
كان بيعمل أول ما جيت، وحسيت إني بدأت أكتشف فيه تفاصيل
صغيرة بتعمل فروق بين نغمة كل واحد والتاني، فروق يمكن هما
نفسهم مش حاسين بيها.

ابتسمت، ابتسم عم فايق. لأنه هو كمان كان بيقرا العيون، ورغم
كده ماقدرش يداري دهشته لما سبت الكرسي ووقفت، وقلت له:

- إنت مش محتاج مُساعد؟

زينب مش بتكتب شعر

في اللحظة دي مافيش قُدام زينب غير اختيار من اتنين:

إما إنها تلحق الأتوبيس عشان تزوح الشغل، وإما إنها تجري ورا
البطريق اللي اتسحب جنبها من غير ما تحس، وخطف الأجندة من
أيدها وجري في الاتجاه المعاكس.

بصت زينب يمين، وشمال محتارة، النهارده أول يوم شغل وماينفعش
تتأخر، ثم إن الأجندة مش مكتوب فيها حاجة مهمة، هي صحيح
كانت عاملها عشان تكتب فيها شعر، بس هي في الحقيقة لسه
ماكتبتش فيها حاجة، كل اللي فيها مواعيد، وشوية أرقام تليفونات
مالهاش لازمة وصورة بحر ملزوقة على الغلاف. ابتسمت زينب بعد
ما حسمت أمرها، وطلعت تجري ورا البطريق.

عند الإشارة لقت زينب موتوسيكل فوقه بالونة حوار زي اللي
ببقى جنب الأبطال في الكوميكس، وكان فيها كلام، قعدت زينب
على الموتوسيكل وبدأت تقرا، كان الكلام المكتوب شعر.

الموتوسيكل نور كشافاته، وجري بيها، سأها:

- عاوزه تروحي فين؟

قالت له:

- عاوزه أجري ورا البطريق اللي خطف أجندة الشعر بتاعتي، هو
كان بيجري من هنا.

سكتت زينب فجأة لما لقت حاجة بتجري بعيد لكن الموتوسيكل
قال لها:

- إوعي تبطلّي قراية عشان لو بطلتي قراية حنقف.

استغربت زينب جدًا من كلامه، وبصت حواليتها، كانت كل
العربات، والأتوبيسات فوقها بالونات حوار ملايين كلام.

كان فيه عربيات مكتوب فوقها شعر حلو قوي كانت بتمشي
بسرعة، وكان فيه عربية عطلانة وموقفة الطريق، والبالونة فوقها
مافيش فيها ولا كلمة.

الموتوسيكل سأها:

- إنتِ صحيح بتكتبي شعر؟

قالت له:

- لأ، بس عاوزة أكتب.

قال لها:

- ليه؟

قالت له:

- عشان سمعت إن الورق اللي مكتوب فيه شعر هو الوحيد اللي
ينفع يتعمل مركب، وأنا نفسي أعمل مراكب ورق كثير.

سألها:

- طب البطريق خطف الأجندة منك ليه؟

هزّت كتفها، وقالت:

- مش عارفه. بس خايقة يعملها مراكب قبل ما أوصل له.

سألها:

- تفتكري يكون راح فين؟

قالت له:

- برضو مش عارفه.

قال لها:

- لو جيعملها مراكب، يبقى حيحتاج مكان فيه بحر.

عند الإشارة وقف الموتوسيكل على جنب.

سألته:

- وقفت ليه؟

قال لها:

- القصيدة خلصت.

قالت له:

- بس البحر لسه بعيد، بُص، أنا ممكن أحكي لك حدوتة لحد
هناك.

بدأت زينب تحكي، راحت كشافات الموتوسيكل نورّت من جديد
وجري بيها على طول لحد موقف الأتوبيس، وهناك لقت أتوبيس
مدرسة، نزلت زينب، وطلعت على الأتوبيس.

ماكانش في سواق في الأتوبيس، ماكانش في غير البنات اللي
بصّوا لزينب باستغراب، قالت لهم:

- ماتخافوش، أنا اسمي زينب، ممكن توصلوني للبحر؟!

البنات اللي في أول كرسي قالت لها:

- شكراً.

زينب استغربت قوي، وقالت لها:

- شكراً على إيه؟

راجت ضحكت، وقالت لها:

- لأ، أنا اسمي شكراً، كلنا في المدرسة اسمنا شكرا، وأنا شكرا
الدهشة - اللي صوتي عالي.

زينب سألتها:

- آمال السواق فين؟

قالت لها:

- السواق نزل يفطر، وقال لو اتأخرت ابقوا اندهوا عليا.

سألت زينب:

- وماندهتوش عليه ليه؟

ردت عليها شكرا المجاملة - اللي بتموت بعد ما تتكلم بثانية
واحدة:

- عشان مانعرفش اسمه!

قعدت زينب في وسطهم، كانوا كلهم مختارين، سألتهم:

- إنتوا بتعلّموا إيه في المدرسة؟

ردت عليها شكراً الحبة - المكسوفة دائماً:

- إحنا بتتعلم تدبير مترلي، عشان لما نخرج نعرف نحافظ على الكلام. إحنا اللي بنربي الكلمات كلها.

ابتسمت زينب، وقالت:

- أنا بقى باشتغل في الراديو، باصقف بعد ما الأغنية تخلص عشان الأغاني تبسط، وساعات باصقف في وسط الأغنية عشان ماتنامش.

سألته شكراً الشبع - اللي بيتيجي بعد الحصن:

- يعني إنتي حافظه أغاني كتير؟!

قالت:

- أيوه.

قالت لها:

- طب ممكن تنبي لنا لحد ما ييجي السواق؟!

وقفت زينب في وسط الأتوبيس، ماكانش في دماغها غير أغنية واحدة، قعدت تصقف وهما يغنوا معاها..

إن جيتنا يا جميل / على عيننا جيتك / وإن غبت يا جميل / خليك على غيتك

زينب اكتشفت إن صوتها جميل مع البنات، راحت غنت أغنية ثانية، وثالثة، وبدأت تخمن اسم كل بنت من ابتسامتها، وطريقة لبسها وتصقيفها، كانوا كلهم فرحانين، وانمت إن اللحظة تطول.

لكن فجأة افتتح الباب، وطلع راجل ينهج قال لهم:

- إنتوا كنتوا فين؟! أنا كنت بادور عليكم.

وفجأة الأتوبيس نزل قدامي من السما.

قالوا له في صوت واحد:

- إحنا كنا تايهين.

سألته زينب إذا كان ممكن يوصلها للبحر؟!

قال لها :

- إحنا متأخرين على ميعاد الطابور، أنا ممكن أوصلك لحد

المدرسة، وبعدين تتمشي.

نزلت زينب قدام المدرسة، كان البحر لسه بعيد، وماكانش فيه

حد تسأله. سمعت صوت بيناديبها:

- إنتي تايهة؟

بصت حواليتها لقت صراف آلي واقف جنب الحيط ويشاور لها.

قالت له:

- أنا عاوزه أروح البحر، وأجيب الأجندة بتاعتي.

قال لها:

وأنا كمان نفسي أروح البحر، بس للأسف ما اقدرش، وحتى لو رحت مش حاعرف أعوم.

زينب سألته:

- ليه؟

قال لها:

أولاً عشان وزني، وثانياً لأن كل الناس اللي أعرفها بتحبني عشان الفلوس، عمر ما حد حبني لدرجة إنه يعلمني العوم ويوديني البحر مع إني باعرف أتكلم، وممكن أقول نُكت كمان، بس ماحدش بيسألني غير الأسئلة اللي مكتوبة على الزراير بتاعتي، وبعدين يقولوا عني إني ماباتكلمش.

ضحكت زينب، وباسته في خده بخُج، سمعت صوت غريب، بصّوا الاتنين على آخر الشارع، لقوا المياه جايه من ناحية البحر، ومغرقة الشارع كله. اتفتحت البيبان، والشبابيك حوالِيهم، وهجمت المياه، المياه كانت بتطلع من كل مكان، والسحاب اتجمّع يس مانزلش مطر زي ما كانوا متوقعين، كانت بتمطر مراكب ورق، مراكب كثير بتعوم في كل حته، وكان فيه منها مراكب ملونة كمان.

مسكت زينب في الصراف الآلي جامد من غير ما تعرف ليه، هل
كانت خايفة تغرق أو بجد هي حبتها وعاوزة تعلمه العوم.
سألته:

- إنت مبسوط ؟

الصراف الآلي اتخض من سؤال زينب كأنه كان فاكِر إن كل ده
حلم، قال لها:

- إنت أحلى حاجة حصلت لي.

زينب باسته في خده تاني، اتحرّرت رجليه من الحيطَة، فرّد ذراعه،
ضحك، وزعّق بأعلى صوته:

- أنا كده حاتحول لأمير مسحور.

وبعدين غمض عينيه، لكنه فتحها بعد دقيقة، وماكانش في أي
حاجة اتغيرت غير إن زينب كانت بتحاول تحرك أطرافه الثقيلة عشان
تعلّمه العوم، بص الصراف الآلي في الأرض بحزن، وقال:

- على فكرة أنا كان نفسي أساعدك تحبّي الأجنّدة بتاعتك.

ضحكت زينب جدّا، ولاحظت في اللحظة دي إن ضحكها بتزوّد
منسوب المياه وبتخلي المراكب تقرب منها.

على فكرة زينب مانسيتش أمنيّتها القديمة في إنها تعمل مراكب
ورق كثير، بس في المرحلة الحالية هي مبسوطَة قوي يأنها تكون
البحر.

مدينة الذكريات السعيدة

طيب، أنا حاحكي لك إزاي ده حصل:

ورا البحر الكبير، بتعيش الذكريات، ذكريات كثير جدا يمكن حتى إحنا مانفتكرهاش. ساكنين في مدينة كبيرة لها بوابات عالية، وقباب دهمي، وبيوت مالهش أبواب، مافيهش غير شبابيك ليها ستاير خفيفة، وعلى الحيطان براويز صغيرة فيها صور أصحابها من البشر، الناس اللي جابوها للدنيا عشان يسيبوها بعد كده، وينشغلوا بحياتهم.

في المدينة دي الذكريات مالهش أسماء، وبيقضتوا وقتهم في الوقوف قدام المراية، وغزل الكوفيات الصوف في الشتا والفساتين الحرير الملونة في الصيف. كل واحدة منهم - خاصة الحزينة طبعاً - بتفكر طول الوقت إنها تكون جميلة، على الأقل بما يكفي إن أصحابها يحبوها، ويعتوا لها دعوة عشان تزور مدن البشر.

أنا نسيت أقول لك إن الذكريات الحزينة دائماً ملامحها مش جميلة،
وعيانة طول الوقت، عشان كده يهجرها أصحابها، ويتجري وراها
الكلاب لو حاولت تعدي البحر ليهم من غير دعوة. أما الذكريات
الثانية فدايماً جميلة، عُشاقها كثير، يمشوا وراها، وبيتخانقوا عشان
خاطرها، والذكريات الحزينة يبصوا لها بحقد، وهما شايفين زيارتها
الكثير لمدن البشر، والهدايا اللي بترجع بيها من هناك، ورد، ومفارش
مُطرزة، وقطط صغيرة، وضحكات صافية.

في وسط المدينة دي نادي كبير، بتقعده فيه الذكريات عشان
يتعرفوا على بعض، يشربوا شاي أو يسمعو الراديو، يتكلموا عن
البشر، وكل واحدة تنبأى بالهدايا اللي أخذتها في آخر زيارة، كل
واحدة بتبص بعيد لو أي ذكرى حزينة قربت منها وحاولت تشاركها
في الحوار، لأ وكمان بتسحب إيدها بسرعة لو حاولت واحدة منهم
تسلم عليها لحسن تعدي، فمايكونش قدامهم غير إهم يقعدوا في
ركن بعيد لوحدهم يحاولوا مايصوش لبعض عشان مايفكروش في
مصيرهم المؤلم، وصعوبة إن أي واحدة منهم تكون جميلة.

وفي يوم فكرت ذكرى حزينة إنها تشوف وشها في المراية،
مسكت حته من مراية مكسورة - أصل المرايات السليمة هناك
بتحفظ بالوشوش عشان كده بيخافوا يبصوا للذكريات الحزينة.

الذكرى غمّضت عينيها، وبعدين فتحتها بشوئش، شافت في حنة
المراية المكسورة ولد، وبيت، الولد ماسك شنطة سفر، وإيده بترعرش،
والبيت واقف بيحاول ينده عليه، وبيحرك الشبايك، وبيهرز البلكونة،
وبيرمي نور، وريحه قهوة، ورغوة صابون على الطريق عشان ياخذ
بالة.

الولد كان حاسس إنه عاوز ييكى بس ماكانش في عينيه دموع،
فكرت الذكرى إن ممكن يكون ده سر قبحها، وعذاها الأبدى،
سابت حنة المراية المكسورة، ورفعت راسها فشافت ذكرى جميلة جداً
ماحدش شافها في المكان قبل كده، شايله أكياس صغيرة فيها ملبن،
وسكر نبات، ولابسة شال أبيض جديد ريحته نعناع - والنعناع هناك
علامة على الثروة.

كانت بتضحك لها، ومادة لها إيدها عشان تسلّم عليها، أخذتها
المفاجأة لدرجة إنها تأخرت كتير في مد إيدها عشان تلمس الإيد
الناعمة الممدودة ناحيتها. إدت لها هي، والذكريات من الأكياس اللي
معاها، وقالت لها إنها رايحه بكرة مدينة البشر، وبتعزمها إنها تيجي
معاها عشان بتخاف من الوحدة. نسيت أقول لك إن الذكريات
كمان بتألّم من الوحدة، لا وبتخاف منها كمان لأنها بتخليها
ترعرش، وتخلي ضحكها مرة ولونها باهت وبتحولها لذكرى قبيحة
حتى لو كانت في الأصل ذكرى سعيدة.

لحظة الصمت طالت لدرجة إن الذكرى الجميلة افتركت إنما ما
اتحمستش لطلبها، فعرضت عليها إنما تشاركها في الهدايا اللي
حتاخذها هناك، وطمنتها إن أصحابها كرما قوي ويحبوها بشكل غير
عادي. الذكرى الحزينة لقت نفسها بتبكي كثير، دي المرة الأولى
اللي بيتحقق فيها الحلم اللي طول عمرها بتتمناه، واستحملت عشانه
كل الإهانات دي من الذكريات الجميلة.

لدرجة إنما في عز فرحتها ماجاش في بالها تسأل نفسها إزاي
الذكرى الجميلة دي لمستها من غير ما تخاف من العدوى؟، أو ليه
اختارتها هي وسابت كل الذكريات اللي أجمل منها بكثير؟ واللي
زماغم دلوقتي قاعدين ورا بلكونات وشبايك النادي الكبير بيصوا
على المشهد باستغراب كبير وحقد حقيقي.

بكت الذكرى الحزينة كثير لحد ما الدموع غسلت وشها،
وعملت بحيرة صغيرة تحت رجليها، ولما رفعت راسها من جديد
وقعت الأكياس من إيد الذكرى الجميلة، ووسّعت عينيها من الدهشة،
وابتسمت ابتسامة كبيرة مبهورة، أما الذكريات الحزينة اللي حوالها
فصقفوا، وضحكوا بسعادة بصوت عالي.

الذكرى الحزينة استغربت، حصل إيه!! طلّعت الذكرى الجميلة
من شنطتها مراية صغيرة، وحطّتها قدام وش صاحبها اللي كان لسه
مليان دموع، الذكرى الحزينة ماصدّقش نفسها، المراية كان فيها

ولد، وبيت، بيت جديد غير الأولاني اللي كان شكله زعلان، الولد حط شنتطته في البيت الجديد، وكان شكله سعيد، وإيديه مش بترعرش، والبيت كان بيرمي نور كثير لحد آخر الشارع كأنه بيحاول يوسع مساحته بأي شكل.

اللي شافته الذكري في الماية خلّاها متحيرة أكثر، دي خلاص بقت جميلة، وأجمل كثير من الذكريات اللي ياما اتكبروا عليها، ورفضوا يكلموها قبل كده!! قامت، وحضنت صاحبها، وغمضت عينها كثير لحد ما فكّرت إن ده ممكن يكون حلم، فتحت عينها من جديد، كانت صاحبها لسه بتبتسم، وبتكرّر عرضها إنما تيجي معاها، وبتديها الماية بتاعتها هدية منها كعربون صداقة، ومن بعيد سمعت الذكريات الجرس العالي بتاع عجلة ساعي البريد، قرب منها، وحط في إيدها صدفة صغيرة ملفوفة في شرايط ملونة.

كل اللي بيحصل ده كان أكبر من قدرتها على التحمل، دي دعوة لزيارة أصحابها في مدينة البشر!! أكيد هما عرفوا إنما بقت جميلة، ومن النهارده مش حتبطل سفر، ورجوع من مدينة البشر المنورة اللي ورا البحر.

هنا ظهرت عليهم الحيرة، كل واحدة دلوقتي معاها دعوة في مكان مختلف، حيروحوا فين، وهل ممكن يفترقوا بعد كل ده. لحد ما الذكري صاحبة الشال الأبيض خدت قرار:

- أنا حاجي معاكي لحد ما تخلصي الزيارة بتاعتك، وبعدين إنت
تيجي معايا.

وبالطريقة دي اتفاجئت وأنا ساند ضهري على كرسي القطر
بفراشتين ملونين جاين يقفوا على كفي. أنا نسيت أقول لك إن
الذكرى اللي بتزور أصحابها يبقى ليها كامل الحرية إنما تختار الهيئة
اللي هما حيشوفوها بيها، سألت الذكرى بتاعتي عن الثانية فحككت لي
الحكاية كلها، ضحككت من قلبي، واتكلمنا كثير، إديت لها أغنية
بصوت أسمهان، وورقة صغيرة مرسوم عليها طائر كناريا، ولما حسيت
إن جناحاتها بتترعش عرفت إن دي أول مرة تاخذ فيها هدية من حد،
إديت للذكرى الثانية رباعية لصلاح جاهين وطلبت منها إني أروح
معاها لصاحبته اللي جاية عشان تزورها.

وأول ما وصلت هنا، شفتك وإنك ماسكة فنجان النسكافيه
بإيديكي الاتنين عشان تتدقي، وبتجني النظر للناس، وبتشغلي نفسك
في شاشة الموبايل بتاعك، وأول ما ضربتي بصوابعك على طرف
الترابيزة عرفت إنك بتسألني نفسك هي الذكرى اللي طلبتيها
أتأخرت ليه كل ده، أول ما عينك جات في عيني عقلي وقف عن
التفكير في أي حاجة.

ماكتش لسه عرفت إني حببتك، كل اللي كنت عاوزه إني
أشكرك عشان خلّيتي الذكرى الحزينة بتاعتي ذكرى جميلة، ماكانش

عندي غيرها وكنت حاسس بالوحدة، أيوه ممكن الإنسان يحس
بالوحدة لدرجة إنه يستدعي ذكرياته المؤلمة.

حتضحكي لما تعرفي إني ما كنتش باهتة في أول الكلام عشان
خايف أو متلخبط لكن عشان الفراشتين كانوا بيشاوروا لي من بعيد
ويقكروني باللي أنا جاي عشان أقوله.

أصلي نسيت كل حاجة ساعة ما شفتك.

حواديت الأتوبيس

أجمل أوقات أُمِّي بتقضّيها جنب الشباك تتفرّج على محطة
الأتوبيس، وأول ما ييجي العصر تناديني عشان أقعد جنبها.

أنا كمان كنت باحب المنظر ده.. لما يقف الأتوبيس قدام المحطة،
ويزول الفل، ويركب البنفسج على الكراسي. أُمِّي بتقول إن الفل
بيخلي البيوت أدفا عشان كده بتحطه في كل ركن في البيت.

باسألها:

- طيب، والبنفسج ده ييزول فين؟

تحضّني، وتقول:

- في أرض بعيدة عن بيتنا، بعيدة جدا لحسن الحظ، يا رب ما
تشوفها أبدا.

رفقة العجلاتي

تحت بلكونة بيتنا القديم بالظبط كان دُكان عم (رفقة) أحسن عجلاتي في الحنة، كان يياجر (الفرحة) لمدة لفة واحدة، وياخذ في المقابل لحظة ألم صادق من اللي بيحوشها العيال في حصالاتهم، ده طبعًا جنب عمله الأساسي في تصليح (الفرحة) المكسورة اللي ساعات بييجيها له طفل من الحنة، ويقول له إنها مابقتش "بتمشي زي الأول".

كان شغله بيبدأ قبل ما بافتح شباك أوضي الصبح، ويفضل لحد ما باقفل بالليل لدرجة إني كنت باسأل نفسي إمتى بينام؟!.

كان يقعد كل الفترة دي جواً اغل يصلح الحاجات المكسورة أو بييجيب قطع غيار، وبعدين يطلع من العالم الصغير بتاعه شايل (فرحة) سليمة، ويتلمع كأن ماحدش استخدمها قبل كده.

قفلت الشباك، وقلبت الحصالة بتاعتي على الأرض، ماكانش فيها
غير ثلاث لحظات بس من الألم الصادق - طبعا غير العملات المعدن
الكثير المزيفة اللي بنحوشها ساعات، عشان نستمتع بالرين بتاعها
كل ما بنهز الحصالات بتاعتنا. حطيتها على جنب، العملات دي
عمرها ما كانت حتخدع عم رفقة أبدا. حطيت ثروتي تحت المخدة،
واستيت الجمعة اللي جاية بفارغ الصبر.

اللفة الأولى:

عم رفقة مسك لحظة الألم، وقلبها في إيده، وبعدين قعد يضغط
عليها بسنانه، ويرميها على الترايزة الصغيرة عشان يسمع الرنين
بتاعها، بعدين ابتسم لي فابتسمت أنا كمان، كنت عارف إن العيال
دايما بيحاولوا يضحكوا عليه، شاور على يمينه عشان أختار (الفرحة)
اللي حآجرها، مسكت أقرب (فرحة) ناحيتي، كانت الدنيا برد عشان
كده طلعت على أول الشارع ناحية الوسعاية اللي مليانة شمس.

الوسعاية كانت نايمة بعمق في الدفا، وبتتنفس بهدوء، وبتستغل يوم
الأجازة الوحيد اللي بتبعد فيه عن الزحمة والدوشة وماتشات الكورة
والغيار.

على الناحية الثانية كان محل عم "وعد" بيّاع المنامات، كان هادي زي عاداته، وقفت قدام الحل وقعدت أتفرج على المنامات الأليفة في الأقفاس بتاعتها اللي كان عم وعد وقتها مشغول في تنضيفها، ألوانها جميلة مش زي الألوان اللي بنبلسها، وصوتها خفيف مش حتقدر تسمعه غير لو غمضت عينيك.

على الناحية الثانية من الحل كانت الكوايس قاعدة بتبص على الطريق بملل، وبتخريش الأرض برجليها، عم وعد ماكانش بيربط الكوايس بتاعته عشان عارف إنها متدرّبة كويس، بس أنا كنت راكب (فرحة).

قعدت ألفت حوايلها، أطلع لها لسانى، وأقلد صوت المنبه، واحد منها بص لي، وبعدين كلهم طلّعوا يجروا ورايا. ضغطت البدال جامد، وقعدت ألفت في الوسعاية، وأطلع من الشوارع الجانبية، وهما عمالين يخطّطوا في بعض، وكنت باضحك وكانت ضحكتي بتعلا لحد ما لمست الهدوم المتعلقة في بلكونات البيوت، بس الضحكة بدأت تنزل شوية بشوية لما لاحظت إن واحد منهم - أكبر واحد فيهم - لسه بيتجري ورايا، كان يقرب باستمرار، ضغطت على البدال أكثر لحد ما جبت أقصى سرعة للـ (فرحة) بس هو فضل يقرب، يقرب لحد ما عضني في رجلي، صرخت من الألم واتدحرجت أنا و(الفرحة) على الأرض، غطى الألم على عينيّا وغبت عن الوعي.

لما فتحت عيني كانت السما بيضا مافيهاش ولا لون تاني،
والشجرة اللي جني عبارة عن جذع رمادي غامق فوقه مساحات
متداخلة من الرمادي الفاتح، والشبابيك زي خربشات على وشوش
رمادي مطفية. بصيت حواليا مالقيتش غير الرمادي في كل حته.
مسكت إيد (فرحت) — وأنا إيدي بترعرش.

عم رفقة طبطب على كتفي، وقال لي إنه يعرف الكابوس ده، وإني
لازم أغسل وشي، وإيديا، ورجلي مكان العضة، وبعدين أناام شوية،
وأنا حابقي كويس.

بس قال لي كمان إني لازم أفكر إن (الفرحة) مهما كانت حالتها
كويسة يبقى ليها سرعة محددة ماتقدرش تعديها.

شكرت عم رفقة، ومشيت بس إيدي كانت لسه بترعرش.

اللفّة الثانية:

رد فعل بابا فاجئني جدًّا أول ما عرف إني نازل أخذ لفة —
(الفرحة)، كان بيزعق، وكان باين عليه إنه زعلان جدا، قال لي إن له
أخ كان خبط في حيطه قبل كده، ودراعه اتكسرت لما جريت بيه
(الفرحة) مرة واحدة بسرعة كبيرة.

افتكرت إن عم رفقة عمره ما حذّرنى من السرعة الزائدة.

قعدت أتخايل عليه لحد ما وافق أنزل بس من غير ما أبعد عن
البيت، ولما جريت على السلم وأنا رايح لعم رفقة خدت بالي إن بابا
ماسألنيش جبت منين لحظة الألم الصادق؟!

على شط النيل كان فيه مركب صيد بيستريح، كان فوقه شراع
أبيض عالي، الشراع خلاّني أقف، لما كان الكبار ييسألوني نفسك
تشتغل إيه لما تكبر كنت باقول لهم:

- شراع أبيض، عشان أحضن الهوا!

فوق المركب كان فيه ثلاث مراكية بيغنّوا، واحد منهم شاور لي
عشان أتغدى معاهم، هزيت راسي:

- بابا قال لي إن عزومة المراكبية مابتشبعش.

واحد منهم زعق:

- طب تعالى اتفرج على الشراع من قريب.

فرحت ونزلت جري!

المراكبية بطلوا يغنّوا، وقعدوا يتفرّجوا عليّا، ويضحكوا، كنت
بامد إيدي في الأكل، وأرفعها على بُقي من غير ما أبص، أحيانًا كانت
تيجي على مناخيري أو على خدي أو تتعلق في الهوا قدامي كده،
كانت عينيا متعلقة تماما بالشراع اللي بيطيّر، كان شكله أوسع من
هنا، وعالي كمان كأن اللي بيوصل لآخره ممكن يبقى ملاك.

طلعت، المراكبية قالوا لي أمسك في الحبال جامد، وأنا مش حاقع،
بس صوت رفرفته كان قوي لدرجة إني كنت ساعات بافقد إحساسي
بالجاذبية.

مسكت في الحبل وقربت، وأول ما وصلت مذيت إيدي ناحيته
بس كنت لسه خايف ألسه، كان ينبّض تحت إيدي كأنه بحر، يبعد،

ويقرب، سألت نفسي هو ممكن - لو قرب فجأة ولمسني - ياخديني
جواه وأغرق؟!

أنا كنت خالي وقلبي الدنيا مش شاغلاه

صبحت يوم التقيته وهن.. ومني تاه

بيكي على أي شي.. يرتاح لقولة آه

العشق خلاه حزين ولا البعاد خلاه

سألتهم:

- هو ليه عزومة المراكبية مش بتشجع، مع إني شبع؟

بطلوا غنا مرة واحدة وبصوا لبعض، واحد منهم شاور لي فرحت
قعدت جنبه، كان أكبر واحد فيهم وصوته ييفكرني بمطرب أنا باحبه،
لقيته بيقول لي:

- زمان خالص، قبل ما إنت تتولد، المراكب كانت بتمشي في
الشوارع مع الناس، والحناطير، وكنا كلنا أصحاب عايشين في نفس
البيوت. بس في يوم جه وحش كبير لونه أزرق اتخانق مع واحد
مراكبي، راح خطف المراكب كلها، الكبيرة والصغيرة، وكسر رجليها،
وحبسها هنا وقعد محاطها من كل ناحية عشان ما تهربش.

من ساعتها مافيش، ولا مركب يقدر يهرب ويرجع الشارع تاني.
فضلنا إحنا المراكبية نبص على الناس اللي ماشية من بعيد، وكل
ما حد يعدي ننده له ييجي يقعد معانا، لكنه بيخاف من الوحش
الكبير الأزرق فيبتسم، ويرفع إيده ويقول لنا شكرًا، هي دي العزومة،
بنعزمك على ابتسامة، والخلو شكرًا، عشان فيه ناس كثير بتنسى
نفسها وسط الشغل الكثير والدنيا لحد ما تحيلهم أنيميا من قلة
الابتسامة أو لون وشهم يزرق من نقص شكرًا.

بعدين حط إيده على كتفي، وقال :

— على فكرة أنا مبسوط إن إنت شبعت!

ماخدتش بالي من ابتسامة الشبع الواسعة اللي على وشي إلا لما
حسيت بيها بتصغر، وبتبعد، كانت الشمس قربت تغيب، ومعاد عم
رفقة قرب. عذيت الجسر الخشب القصير وفكّيت (الفرحة) اللي
كنت رابطها في شجرة قريبة لقيت في السلة اللي قدام لفة كبيرة فيها
هوا من اللي بيعجزه المراكبية في الشارع الأبيض، شكرتهم من
بعيد، وفتحت اللفة لقيت قميصي وسع، وفروع الشجر رجعت لورا،
بالعافية قدرت أتحكم في (الفرحة) اللي كانت بتجري بسرعة كبيرة
لحد ما وصلت قدام بيتنا، سبقني الهوا وطلع على شباك أوضتي.

اللفة الثالثة:

- عم رفقة، أنا عاوز أدخل أتفرج على اخل من جوا.
عم رفقة اتفاجيء بالطلب ده. حط لحظة الألم الصادق في الدرج،
وغمض عينيه. يمكن ماحدش طلب منه الطلب ده قبل كده، بس دي
كانت أمنيقي من زمان.

- اقفل الباب وراك، وتعالى، بس ماتعملش صوت.
كتمت ضحكي بصعوبة³ وأنا بانزّل الترباس من جوا، بصراحة
ماكنتش مصدق إنه حيوافق. عدينا في ممر طويل على الجنين فيه
(أفراح) كثير مستنية تتصلّح، وقفنا عند باب صغير في آخر الممر،
بص لي عم رفقة، وحط صباعه على شفايفه وهو يفكّرني إني ما
اعملش صوت، فتح الباب لقيتني اتسمرت في مكاني وصرخت،

صرخة صغيرة مبسوطة ومندهشة ويمكن كمان خائفة، صرخة نسيت فيها كل تعليمات عم رفقة والمحل والبيت والألم الصادق وعم رفقة نفسه!

كنت واقف قدام ساحة كبيرة أرضيتها سحاب ناعم ماشي ببطء، وفي وسطها أوضة صغيرة لونها ذهبي، عدى عم رفقة في الأول، وشاور لي عشان آجي. أول ما حطيت رجلي اليمين رجعت لورا بسرعة وأنا خائف، كانت رجلي بتغوص في السحاب ده. عم رفقة هز راسه فحطيت رجلي تاني، السحاب كان بيثيلني، ويعدي بيًا من غير ما أرفع رجلي. أول ما قربنا لاحظت (أفراح) كثير حوالين الأوضة الذهبي، وعصافير كثير ملونة، بتزل وتطلع حوالين الكاوتشات المخرومة وأسلاك الفرامل المقطوعة والكراسي المكسورة.

- هو إحنا فين؟ إحنا سبنا الشارع؟ والمكان ده فين وإزاي
ماحدث شافه قبل كده؟

عم رفقة شاور بصباحه فبصيت معاه لفوق، كانت عصافير كثير جاية من الممر اللي كنا جاين منه، كانوا شايلين قضايق ورق ومناديل وورق شجر وأظرف جوابات مقطوعة وحاجات تانية ماخدتش بالي منها، كانت بترميها في كف عم رفقة وهو بيحطها على الجزء المكسور في (الفرحة)، تقوم الأسلاك تتلحم من نفسها والكاوتشات تتملي هوا والدهان يلمع و(الفرحة) ترجع جديدة.

عم رفقة قال لي إن معظم الأعطال بتيجي من سوء الاستخدام،
وإنه وهو صغير كان يباخذ باله من (الفرحة) بتاعته أكثر من العيال
دلوقتي، ولما لقاني بابص على الحاجات اللي شايلها العصافير وأنا مش
فاهم قال لي إن الحاجات دي كان العيال بيلاقوها في السلة اللي من
قدام في (الفرحة) ويرموها باعتبارها مالهش قيمة، مع إني دايمًا كنت
بانصحبهم ماحدش يرمي أي حاجة لمست (فرحة) — ه مهمما كانت.

كنت لسه مستغرب المشي على السحاب، وكان فيه ريحة ريحان
طالعة من الأجزاء اللي اتصلحت، وصوت ناي خفيف، خفيف جدًا
لدرجة إنك ممكن تكسره بصوابعك، عرفت بعدها إنه يساعد
العصافير على التركيز ويقلل من وزن الناس عشان يقدر السحاب
يشيلهم من غير ما يقعوا.

فهمت ليه عم رفقة كان بياكد على إني ما اعملش صوت.

سألته بشويش:

— هو صحيح عمي اتكسرت ذراعه عشان (الفرحة) جريت بيه
فجأة وخلته يخط في حيطه؟

لقيته بطل يتسم:

— (الفرحة) مابتعملش أي حاجة فجأة، هو اللي كان بيمسك في
الجادون جامد، حذرتة كتير وقلت له يرخي إيده شوية بس هو كان

عاوز يحاصر (الفرحة) عشان ماتفلتش منه. قلت له كثير إن (الفرحة)
اللي بتحس بالحصار بتتخنى وتتبقى ضعيفة وسهل تقع. عشان كده
لما اتكسرت (فرحت) به ماعرفتش أصلحها له.

رفع راسه لفوق وغمض عينيه، قال:

- عشان أبني المكان ده، عشت فترة كبيرة مع ناس ماباحبهمش،
كنت باحوش لحظات ألم كثير، عشان ماحبيتش أشتري (فرحة)
تخصني لوحدي، كنت باحلم أخلص البشر من الألم.

بص لي، كان في عينيه دموع، قال بنفس الصوت الهامس:

- تعرف تروّح لوحداك من هنا؟

هزيت راسي فوق وتحت، مع إني كنت نسيت إحنا جينا هنا إزاي.

بيّاع الأمان

شايّف الطابور ده، امشي معاه للآخر، لو لف لازم تلف معاه، ولو
لقيت مكان فاضي في النص اوعى تقف فيه، في الطابور ده بالذات
ماحدش يقدر يقف مكان حد، وعند أول الطابور حتلاقي دكان عم
"أمان".

أول مرة سمعنا عن عم أمان كان من زمان قوي، قالوا إن فيه
واحد ييشترى المشاعر المُستعملة، ويبدلك مكانها علب فاضية،
ماحدش كان فاهم إيه اللي ممكن يكسبه الراجل ده من المشاعر
المُستعملة، اللي الناس بترميها في أكوام كبيرة بيسموها "بارات"، ولا
حد كان فاهم إيه اللي ممكن نكسبه إحنا من علب فاضية.

وقتها ماكانش الدكان مشهور زي دلوقتي، ماكانش فيه زحمة ولا
بوابات إلكترونية ولا ديابة لابسة بدل سودا بتنظم الطوابير، كان
مجرد دكان صغير في شارع جانبي.

الدكان كان فيه كل أشكال العلب، كان فيه علب على شكل
مركب، وعلب على شكل بيت، أو خزانة، أو صليب، أو حضن، أو
مسدس، العلب كان باين إنها ممكن تنفع في حاجات كتير، وكانت
كلها مُتاحة بين إيديك، مافيش علب غالية، وعلب رخيصة، اختار
اللي إنت عاوزه وامشي.

بدأت الناس تعرف المكان، ورجلهم تاخذ عليه، وبدأت العلب
تظهر في البيوت والمحلات والقهاوي. في الأول كانوا بيعطوها فيها
حاجات تلزمهم، وبعدين بقوا بيعتفوها إنهم يحطوها جنبهم، علب
مقفولة وفاضية وجميلة، بعد شوية وقت، الناس لاحظت شوية تغيرات
في دكان عم أمان، مابقاش يسمح لهم يختاروا من العلب زي ما هما
عاوزين، كان يقول إن كل علبة ليها سعر، وبدأ يرفض المشاعر
المستعملة اللي الناس بتجيبها، ويشترط مشاعر جديدة، ويحسّس عليها
يايده عشان يتأكد إنها لسه دافية، وبعدين بقى يشترط عليك كمان
إنك تجيب معاها مشاعر الناس التانية اللي شابكة فيها، لحد ما ظهر
أول ديب لابس بدلة سودا على باب الدكان عشان ينظم الطابور.

وقتها الناس كلها كانت محتارة، العلب كانت كل يوم سعرها يبقى أغلى وشروطها أصعب، وكانوا كلهم اتعودوا خلاص على وجودها. ماحدش بقى ينাম إلا بعد ما يبص للعلب، ولا يتعرف على حد إلا لو ماسك في إيده علبة، ولا يقرأ كتاب إلا لو مرسوم على غلافه علبة. مابقوش بياكلوا الحاجات اللي طعمها بيزغزغ ويخليك عاوز ترقص، بقوا بياكلوا من العلب. مابقوش بيرتاحوا في البيوت حسب مساحة البلكونة أو عدد القطط، بقوا بيدوروا على العلب. مابقوش بيختاروا الشارع اللي يقع عليه ورق شجر أو اللي ينط في البحر، بقوا بيمشوا مع العلب.

ماحدش فيهم كان يفكر حيعمل إيه من غير العلب، كانوا يفكروا حيعملوا إيه لما مشاعرهم تخلص؟!

وفي يوم، قررت أتسحب لدكان عم أمان، وهو مقفول. استنيت للضهر، أصل عم أمان بيفتح طول اليوم ما عدا ساعة الظهر، عشان يقول إن الشمس الحامية بتخلي العلب تتكسر، والضلمة اللي جواها تفور. لفيت من ورا الديب اللي لابس بدلة سودا، ودخلت من الشباك. الحل كان ضلمة، وساكت قوي، قعدت أبص له وأستغرب من شكل الحل اللي بيقى عامل زي الطاحونة في أوقات الشغل، كان مكتوم كأنه سر، مقفول كأنه قلب جاحد، مخيف كأنه علبة فاضية.

- ممكن تقعد، لحد ما تقرر عاوز تعمل إيه.

اتخصّيت قوي، وبصيت ورايا لقيت عم أمان طالع من المخزن،
مسنود على عصايته وباصص لي قوي كأنه عارف أنا مين رغم
الضلمة. في الحقيقة أنا ما اتخصيتش من وجوده، اتخصيت عشان أنا
فعلا ما كنتش عارف أنا جيت هنا ليه. هل كنت عاوز أتفرّج على
المحل، بس المحل مفتوح ومنور طول النهار والليل. هل كنت غضبان
وعاوز أكسر العلب كلها، بس أنا جربت قبل كده وماعرفتش أكسر
أي علبة. طب يمكن كنت عاوز أتكلّم مع عم "أمان" لوحدنا، بس
لقيت الكلام جوايا كله لزق في بعضه. كان لسه باصص لي، جسمه
التخين بيتهز بخفة مع الهوا، وشعره الأبيض بينور في الضلمة والعلب
على الرف اللي وراه بتتبض من غير صوت. مشيت ناحيته خطوطين،
طلعت قلبي، مسكته في إيدي وهزيت زى الحصاة، نزلت منه كتلة
مشاعر كبيرة جدا داخله في بعضها زى بكرة الصوف، مشاعر طازة
ومنسية، مفهومة وغامضة، تخصني وتخص ناس تانية. ابتسم عم أمان
وقال لي:

- إحنا مش ببيع غير في أوقات العمل الرسمية.

قلت له:

- أنا مش عاوز أشتري علب، أنا عاوز أشتري الدكان.

ضحك عم أمان بصوت عالي، وفضل يضحك لدرجة إن العلب
وراه كانت بتردد الصدى.

قال لي:

- إنت أكيد تعبت قوي لحد ما جمعت المشاعر دي كلها.

هزيت راسي:

- أيوه.

راح مسك إيدي وفتح باب المخزن، ودخلنا مع بعض.

ورا الباب ده كان فيه ساحة واسعة مرصوفة بالأسفلت، ساحة مفتوحة على السماء، والمطر نازل عليها طول الوقت، مع إن يومها كانت الشمس طالعة وما فيش غيم. الساحة كانت فاضية مافيهاش غير بلاعات كتير على الأرض، بيتجمع فيها المطر اللي نازل، ولو واحدة فيهم طفحت بسبب الميا الكثير كانت البلاعات اللي حوالها بيسحبوا الميا من فوقها قبل ما تغرق. مشينا أنا وعم أمان وسط البلاعات، كان فيه بلاعات كبيرة وصغيرة، مربعة ومثلثة وعلى شكل أقواس، مرسوم عليها نجوم بتتور وقطط بتتحرك أو مكتوب عليها حروف متبعترة بتتجمع لوحدها لو قربت منها. سألته: إحنا فين؟

قال لي:

- أنا وراثت المهنة دي عن والدي، كانت دايماً مهنة مربحة، لأن سهل جدا إنك تقنع الناس تتخلي عن مشاعرهم، الناس بتخاف من كركبة المشاعر.

قلت له:

- والعلب، اللي إنت حبستنا جواها.

قال لي:

- بعد ما القلوب تفضى من كل حاجة، بتحتاج العلب عشان
تحافظ عليها، ولولاها حتطير في الهوا.

قلت له:

لكن ليه لازم تبقى فاضية.

ابتسم تاني وقال لي:

- أنا مش شرير زي ما إنت متصور، الحقيقة إني جربت كثير،
لكن لقيت إن الناس مابتجيش العلب المليانة، لأنها بتشاور على
فراغات قلوبهم، وبتفكرهم بالتمن اللي دفعوه. إنما العلب الفاضية
بتحميهم من غير ما تسألهم أي سؤال. تعرف، أنا اكتشفت ده
بالصدفة لما شفت نعامة بتدفن راسها في الأرض. الأرض، أكبر علبة
فاضية شفتها في حياتي.

قلت له:

- وماحدث حاول يقاومك؟

قال لي:

- بالعكس، فيه ناس رفضت في الأول، وواجهوني.

كانوا يحاولوا يجمعوا كل المشاعر من الناس قبل ما آخذها منهم، ويزرعوها قدام بيوتهم أو على سرايرهم أو في قلوبهم، عشان تفضل عايشة لحد ما باقي الناس - شوف التفاؤل - تفوق وتعرف قيمتها.

كانوا يفرحوا بالنيابة عن اللي بيحوا جديد، ويندموا بالنيابة عن المتحزين، ويبغوا بالنيابة عن الشجر، ويحنوا بالنيابة عن النوارس، وأنا سبتهم يعملوا ده عشان كنت عارف إنها مسألة وقت. وفي يوم، ماقدروش يستحملوا اللي شايلينه، وقعوا كلهم في لحظة واتحولوا لبلاعات..

بلاعات بتستقبل طول الوقت هواجس الناس ومحبته المهدرة ومشاعرهم اللي بتبان عليهم وفشلهم في إدارة خوفهم، وكل الحاجات اللي الناس بتتخلص منها كأنها تراب على جسمهم. كانوا تعبوا لدرجة إنهم مابقوش قادرين يميزوا بين اللي بيتحط في الذاكرة يغذيها واللي بيتحط في الذاكرة يسممها، بين اللي بيعلم القلب الشغف واللي بيعلمه الجبن.. عينهم بقت ساكنة، وأحضانهم مش بتقل كويس، وقلوبهم بترتعش طول الوقت، ومش قادرين يكملوا علاقة طبيعية واحدة، ودايما بيصوا لنفسهم على إنهم بوابات لمرور الزمن والناس والمشاعر والفضلات، بلاعات وبس.

سكت عم أمان، فحسيت إحساس ثقيل ضاغط على جسيمي،
زي المطر اللي نازل. بصيت تحت رجلي، لاحظت حركة غريبة في
البلاعات، كانت بتتهز وتزوم، وبعدين اتحولت كلها لوشوش بتبص
لي، وشوش حديد مطفية غرقانة بالميا. ماحسيتش بنفسي غير وأنا
باجري، باجري من الساحة ومن المكان كله، وكتلة المشاعر اللي
خرجت من قلبي بتطاردي، بعد ما اتحولت لكورة حديد شبه كورة
البلدورز، بتنط فوق البيوت والشجر والأحلام وبتحولها لخراب ميت.
بصيت لها وأنا لسه باجري، كانت بتقرب، لو وقعت عليا في النطة
اللي جاية حاتحول لبلاعة فورا، بلاعة ساكنة في مخزن عم أمان.

إزاي كل الخراب ده خرج من قلبي؟!

مش بيشوفوا في النور..

وبيعملوا ريحة للدنيا

حتبقى مشكلة كبيرة قوي لو الليل دخل وإسراء لسه مارجعتش البيت. إسراء بقاها ساعتين دلوقتي بتلف في نفس الشوارع من غير ما تلاقي بيتها، وكانت أول مرة تكتشف إنها عمرها ما عرفت شكل البيت من برا، لأنها كل ما كانت بتحب تروّح كانت بتغمض عينيها وتغني للرجس اللي في الجنينة. "كل الجنانين فيها نرجس، ونرجسي فيه كل الجنانين" لحد ما تلاقي حاجة بتشد طرف الجيبة بتاعتها، وتفضل تمشي وتلف معاها وهي ساحبة طرف الجيبة لقدام كأنها شراع لحد ما توصل. حتى لو كان الجو فيه تراب أو شبرة أو كان الشارع زحمة أو حتى ماكانتش فاكرة كلام الأغنية، كان النرجس

بيدور عليها ويوصلها لحد البيت. وكان النرجس يبجها لأنها الوحيدة في البيت اللي بتستاه عشان يدخلوا مع بعض، لكن الباقيين بيخافوا يغمضوا لحسن يخطوا في السور. بس النهارده النرجس زعلان منها عشان خرجت من غير ما تسقيه.

الموضوع بدأ من زمان، النرجس ده كان بتاع باباها، وكان هو اللي بيسقيه كل يوم ويسقي حتى الهوا اللي حواليه. ولما باباها سافر سفر طويل وصاها عليه، وقال لها: الشارع سم يا إسراء، الناس سم، الهوا سم، ومافيش علاج غير في النرجس.

فضلت إسراء تكتب جواب لباباها كل يوم، كانت ساعات تقول له بابا فيصحح لها ويقول "بياع النرجس"، وساعات تمضي باسم بنت بياع النرجس فيصحح لها ويقول "مخدة بابا الحلوة". وفي يوم صحيت إسراء وجات تكتب الجواب لقت مافيش ألوان خشب، هي بتحب الألوان الخشب في الكتابة عشان بتقدر تترجم الجمل الصعبة لوحدها. فضلت إسراء تدور هنا وهنا، مالتقتش. حاولت إسراء تكتب بقلم حبر، راحت الحروف بصت لبعضها بغضب وقعدت تتخاق على الورقة وتزعق، جربت الفلوماستر لقت الحروف بتجري من سن القلم وكل واحد بيروح لحنة، غضبت إسراء قوي عشان ده مش وقت لعب.

خرجت تدور عند كل الجنائنية اللي حوالها قالوا لها لسه بدري على موسم الألوان الخشب، وكانوا ييلوموها إنها ما اشتترش كمية كافية عشان تقضيها، فكانت بتقول إن الشتاء ده كان طويل وبارد قوي، وخلوها تخلص مخزون الألوان في تلوين النور اللي طالع من اللمبات العيانة. وفي آخر اليوم حسست بحاجة غريبة، كان بقاها كتير قوي ماشية في نفس الشارع من غير ما تشوف البيت، ولما الليل قرب خافت جدا لأن البيوت حتنام وحتفضل تايهة كده للصبح. قابلت إسرائ ولد صغير سألته عن البيت اللي طالع منه الترجس، قال لها:

- إنت مش عارفاه؟

قالت له:

- أنا عمري ما روحت بالليل كده.

قال لها:

- هو هناك، بس مش حتقدري تروحي دلوقتي عشان زمانه نام. حتفضلي معانا هنا في الشارع لحد الصبح. تعالي معايا.

مسك الولد إيدها ومشوا، كانت أول مرة تمشي فيها بالليل. الضلمة كانت تاغابها قوي وكانت بتكعبل كتير، بس الولد في كل مرة كان بيسندها. ماكانتش فاهمة إزاي كان عارف طريقه كده كأنه

ماشي بالنهار، ولا كانت فاهمة ليه كل ما حد يعدي عليهم بيسلم
على الولد بس، ولا بيكلمها هي ولا حتى يبص لها. سألت الولد مرة:

- هو مش شايفني ولا إيه؟

قال لها:

- ماحدش بيشوف حاجة بالليل. هو بيعرف الحاجات اللي ليها
ريحة، وإنتي النهارده مطرودة من النرجس.

قالت له:

- طب وبعدين.

قال لها:

- النرجس حيسامحك بكرة الصبح، المهم دلوقتي نلاقي ألوان
خشب.

فضلوا ماشيين، شافت إسراء البيوت وهي بتلم شبابيكها
وبلكوناتها وأصواتها كأنها ورد بيغمض، والعساكر وهما سهرانين كل
واحد ماسك عصاية وكيس معطر جو عشان يمنع أي ريحة إنها تعدي،
وإشارات المرور معلقة وردة بلدي حمرا ووردة عباد شمس وسايين
فراغ مالوش ريحة مكان اللبنة الخضرا. الجوامع كانت شالت المآذن
كلها وحطت مكانها أعواد بخور كبيرة تنادي على الناس، والسينما
كانت قرايز عطور كبيرة مرصوص قدامها كراسي، منها اللي معمول

في مصر والمستورد اللي معاه ترجمته والعطر ثلاثي الأبعاد اللي
السينما بتدي لك جناحات تلبسهم قبل ما تتفرج عليه.

حاولت إسراء تقعد على قهوة بس الولد شد إيدها وقال:

- بلاش دي، القهوة دي بتغش المشاريب، بتحط على الحزن
الصادق ريحة شاي وعلى الونس المزيف ريحة النسكافيه وعلى
الذكريات الساقعة شوية صودا وتقدمها للناس. وفيه واحد بيع
ممنوعات كمان، بيعدي شايل صابون وشاور جيل للي عاوز ينسى
ويقضي الليلة من غير ما يفكر.

إسراء كانت تعبت، حاولت تغمض عينيها لكنها اكتشفت إنها
مش فارقة كثير. فضلوا ماشيين لحد ما وصلوا الكورنيش. النيل كان
جايب هوا جميل، غالبا هو ده السبب اللي بيخلي الكورنيش أعرض
بالليل والناس صوئها أوضح. ضحكت إسراء في سرها، كانت بدأت
تفكر بطريقتهم!

على الكورنيش كان فيه كراسي كثير وناس قاعدين، وعلى
كرسي كبير كان الشيخ سيد مكاوي قاعد يقرأ الكف للناس، بيشم
صواب الواحد منهم ويقول له كل اللي حصل في حياته. نده عليها
من بعيد فاستغربت،

قالت له:

- إنت شايفني؟

قال لها:

- ريحة خوفك سابقاكي. إنت تايهة ولا إيه؟

قالت له:

- أيوه.

وبعدين شاورت على الناس اللي قاعدين وقالت:

- مين دول؟

قال لها:

- دول اللي مش بيشفوا في النور.

سألته:

- ويعملوا هنا إيه؟

قال لها:

- يعملوا ريحة للدنيا. الدنيا بتموت بالنهار من غيرهم، وهي
فكرة نفسها عايشة، وبتتنفس بيهم بالليل، وهي مش عارفة قيمتهم.

قعدت إسراء جنبه وقالت له:

- تعرف، أنا كنت فاكراك بتكذب لما قلت الورد جميل جميل الورد، عشان كنت مبسوط قوي، لدرجة إني سألت نفسي إنت عرفت إزاي.

قال لها:

- أنا طول عمري في الشارع، باسهر وباتكلم مع الناس لحد ما جنيئة خطفتني مرة جواها وحولتني لوردة، ومن يومها وأنا باعرف ماضي الناس من ريحة الدقايق اللي بتتولد أو بتدبل في أيديهم. هاتي إيدك.

مسك الشيخ سيد أيدها وعداها على وشه بشويش، وبعدين قال لها:

- إنت اعتمدتي على باباكي، وعمرك ما اشتريتي ألوان خشب لنفسك. كنتي بتخافي من ريحة أي حد عشان كده كنتي بتجري لما حد يحضنك. ركبت شفاط في الحيطه جنب صورة باباكي عشان يسحب ريحة الحنين على برآ، ولما مانفعلش علقتيها في الجنيئة. بتسيبي الشباك مفتوح في الصيف ومع ذلك ريحة شياط قلبك ساعات بتصحكي من النوم. والأهم، بتخافي تغني الورد جميل وإنني مع حد عشان ساعتها الورد بيطلع من كم البلوزة ويقول للناس إنك بتداري حاجات كثير.

سحبت أيدها وقالت له:

— أنا خائفة.

هز دماغه وقال لها:

— أنا عارف. لسه مالقيتيش ألوان خشب.

قالت له:

— ليه الجوابات لازم تتكتب بألوان خشب؟

قال لها:

— الألوان الخشب زينا كده، إحنا ممكن نمشي بأستيكة، إنما الألوان الثانية كلها زي الناس بتوع النهار، بتحتل المساحات بالإكراه، بتبني بيوت وتحفر طرق وتجب شط سفر وتقع على طول. عشان كده الموت عندكم صعب، بتعملوا حفرة في الأرض وتملوها تراب وتعملوا حفر جواكم وتملوها هدم سودا وتعملوا حفر في الكلام تملوها بـ "الله يرجه"، وحفر حتى جوا الصور والأكل والضحك. سألته: طب واللي ييموت هنا؟

قال لها:

— اللي ييموت هنا بيعيله زكام مزمن، ويفضل يمشي يمشي لحد ما يطلع برّا المدينة خالص، ويخط في الدولاب الأزرق الكبير وتقع عليه الهدوم القديمة كلها.

وفجأة سكت الشيخ سيد، وسكتوا كلهم. بصت إسراء حواليتها، كانت فيه ريحة شياط جامدة قوي. خافت وسألته:

- دي حريقة؟

قال لها:

- لأ، ده النهار طلع، حاسيك بقى عشان تروحي، وابقى خدي
بالك من النرجس. افتحي إيدك.

فتحت إسراء إيدها لقتها مليانة ألوان خشب، ألوان جديدة دافية
وليها ريحة حلوة بتزغزغ كفها. ضحكت، قال لها الشيخ سيد:

- إحنا اللي بيزورنا، بيته مش ييخلي أبدا من الألوان الخشب،
ماتبقش تقطعي الزيارة.

تصبحي على خير.

حُضْن النور وحُضْن السكر

الليمونة الصغيرة كانت خائفة في الأول، بصت حواليتها، حاولت
تقرب من الحيطان القزاز اللي حاوطتها فجأة، لكن مامتها - الليمونة
الكبيرة - مسكت إيدها جامد. بصت لها الليمونة الصغيرة، بصت لها
هي كمان جامد كأنها بتمسكها من عينيها. الأرضية المعدنية الغريبة
بتتهز اهتزاز خفيف يا دوب يتحس. برّا القزاز كانت الرغوف
والعلب ولوح الرخام الكبير الممدود لحد الشباك، اللي كان الخضار
يسميه "يوم القيامة"، عشان هو اللي بيحدد إنت حتكمل في المطبخ
ولا حتترمي. الليمونة الصغيرة كانت خائفة.

- ماما هما حطونا هنا ليه؟

- إحنا محظوظين، كتير من أهلنا عاشوا وماتوا من غير ما يشوفوا

الروح.

- الروح؟ يعني إيه روح؟

- دي حاجة مستخينة تحت القشرة بتاعتنا فيها كل الحاجات الحلوة اللي إحنا مانعرفهاش عن نفسنا، ومش ممكن نعرفها غير بالطريقة دي، بس اوعي تخافي.

- الله! لأ مش حاخاف.

مامتها كانت بتقول الكلام ده من غير ما تبسم - إزاي ممكن تطمن حد من غير ما تبسم. الست قربت منهم وغطت الحيطان القزاز بسقف بلاستيك مدور فاخفت السما البيضاء. إيد الليمونة الصغيرة كانت ساقعة بس ماكانتش عارفة دي إيدها ولا إيد مامتها. مامرتش ثانية وطلعت دوامة كبيرة من تحتهم بعدتها عن مامتها وصدمتها في الحيلة. حاولت تصرخ، كلهم كانوا يحاولوا بس ماكانوش بيسمعوا أصواتهم. كان الصوت العالي بتاع الدوامة بياكل كل الأصوات الثانية، ماكانش في إيدهم غير إنهم يتخبطوا في بعض وفي الحيطان القزاز والسقف المدور. أخيرا عرفت تصرخ، كان جسمها كله بيوجعها ومش لاقية منفذ واحد تقرب منه. ليه كده، هو عشان نشوف الروح لازم غوت، ولازم الموت يبقى بيوجع كده.

لحظات كمان عدت، انهارت الليمونة الصغيرة وبطلت تقاوم أو تدور على أي حاجة تمسك فيها، غمضت عينيها وسابت نفسها للألم اللي بيكسرها من كل ناحية. بيكسرها؟ التعبير ده غريب بس حقيقي

قوي، كانت حاسة إن كل خلية فيها بتتكسر، حتى الذكريات القديمة والنوم على فرع الشجرة وطعم الشمس اللي بتاكل وريحه الميا اللي بتسطها وتخلي جسمها يتقل، كل ده بيقع زي المكعبات. طب وأنا؟ أنا مش عاوزة أشوف الروح خلاص!

الدوامة وقفت. الكل هديوا وبطلوا يتخبطوا في بعض. الليمونة الصغيرة خدت نفس جامد فلقت نفسها بتطلع لفوق شوية. المكان كان زي ما هو بس هما اختلفوا كثير، شكلهم اتغير، كأنهم مابقوش شايلين القشرة الخشنة اللي بتخبي الفرحة، مابقوش بيتدحرجوا، بقوا بيطيروا، بيتزحلقوا بنعومة كأنهم موج بيلمس بعضه من غير صوت. وكان فيه نور، حاسة بيه، بيعدى جواها بدفا من غير ما تعرف مصدره، فضلت الليمونة الصغيرة تتزحلق بينهم وهي بتفكر في كلام مامتها لحد ما بقت فوق. بصت في السقف المدور محتارة: هي دي الروح؟

رجعت الست تاني تقرب منهم راحت ابتسمت بلهفة. مابقتش الحاجات اللي مش فاهماها بتخوفها، مدت إيدها تزيح السقف راحت انكشفت السما البيضاء من جديد قدامها. شهقت. نسمة لطيفة عدت جنب خدها فاترعتشت ونور كثير كأنه بحر وقع فوقهم وحضنهم لدرجة الوجع. ضحكت لما شافت نفسها بتتور، بصت حوالها: كلهم كانوا كده، شمس صغيرة خفيفة بتبص لأطرافها المنورة ويتضحك.

- بعد ما نطلع من هنا حتشوفي الدنيا كأنك بتحضنيها، بتحضني
الهوا والكلام وقراز الكبايات والمعلقة الحنية قوي اللي حتعرفك على
السكر.

- السكر، إيه السكر ده، حلو؟

- السكر ده أحلى حاجة في الدنيا.

قعدت جنبهم وهي بتحاول تداري اللففة، كل الكبايات متربة
على لوح الرخام، شكلهم هما كمان مستنين السكر. دق قلبها قوي
لما شافت المعلقة اللي حكت لها أمها عنها. كانت بتحط نقط بيضا
على كل كباية وتقلب بشويش. استريحت قوي لما شافتها حنية فعلا
ومش عيفة زي الدوامة اللي فاتت.

جه دورها، وقعت النقط البيضا لحد ما لمسوا القاع وبعدين
اتحولوا لروح صغيرة شفافه، اتحركت المعلقة الطيبة. إشمعى السكر
بيشوف الروح من غير كل الألم اللي أنا شفته؟ كانت حتسأل بس
روح السكر حطت إيدها على شفايفها وحضنتها برقة وهي بتدور
بيها مع التيار. الليمونة الصغيرة حسست بروحها بتفتكك وتتمتزج مع
الروح الشفافة دي، كأنهم آلتين بيعزفوا لحن واحد يقاعه سريع،
حركة مليانة دفا كأن الكون بيتحرك جواها.

أخيرا فهمت كلام مامتها عن القشرة الخشنة اللي بتغطي الفرحة،
إزاي ممكن نوصف الفرحة! بدأت تعيط. ابتسمت روح السكر

ومسكت إيدها عشان يطلعوا لفوق. كان نفسها تلاقي مامتها قوي
عشان تقول لها إن حضن النور وجعها بس خلاها تشوف نفسها، أما
حضن السكر فخلاها تفرح مع إنه ماجاوبش على أسئلتها.
ولما الكبايات بدأت تتحرك، سابت نفسها للتيار.

أَسْمَا

لما قلبك يتوجع لدرجة إنه يبان على وشك، روح لأَسْمَا.

أَسْمَا كانت بنت بتمسح وشوش الناس من الوجع بمية الورد، دي شغلتها من زمان، من وهي صغيرة ووشها لسه ما اتلونش وكانوا بيقولوا لها يا طماطم، عشان كانت بتحب تقعد جنب مامتها وهي بتغسل الطماطم كل يوم. مامتها قالت لها إن الطماطم مش سعيدة زي الفاكهة، ولا قوية زي الخضار، لكنها بتعرف تحب الأكل كله وتدي له طعم، الطماطم ونس يا أَسْمَا، ونس مش محتاج مننا غير إننا نغسل له وشه كل يوم. لحد ما كبرت أَسْمَا وبقت بتمسح وشوش الناس.

مع الوقت، كانت اتعلمت لون كل وجع، الرمادي بيعجي من الزهق المكتوم والتراب على الكراسي، والأحمر شجاعة الخواف لما

يوصل لمنتهى الخوف، وده بيحصل لما مايقاش عندنا حد يصحبنا من النوم لما نكون مش عاوزين نصحي، والإسود خيبة أمل مفاجئة بتغطي ملامحك زي نيجاتيف حرق نفسه لما لقي إن كل الصور اللي فيه مش بتضحك، والأصفر نور محبوس جوا الجسم من قلة الفصفضة، والأخضر كلام كثير لسه ما استواش بس صاحبه بيستعجل يقطفه.

أسمّا كانت كمان بتسمّي الوجع أسامي تضحك، عشان الناس تضحك عليه ومايخافوش منه. زي مثلاً "البن المغشوش"، و"حرف القزاز المكسور"، و"القلم الجاف القاضي اللي بيخريش الورق". وكان كل حلمها إنها تفضل تمسح ألوانه من وشوش الناس لغاية ما غلبه الألوان بتاعته تخلص. ماكانتش بتاخذ فلوس مقابل ده، بس أهل المدينة كانوا بيعجوا لها كل سنة في يوم عيد ميلادها، ويجيبوا لها سمكة ذهبي. أسمّا بتحب السمك الذهبي، وبتحطهم في الجنية جنب بعض. ودأبما بتقول إنها في يوم حيبقى عندها مية ورد كفاية لإنها تعمل لهم بحر، وساعتها حيتحركوا وياخدوها معاهم.

وفي يوم لاحظت أسمّا حاجة غريبة، صحيت الصبح لقت ناس كثير واقفين على باب بيتها، ساكتين خالص وإيديهم جنبهم ووشوشهم متلونة بألوان غامقة. استغربت قوي، لكنها دخلتهم واحد واحد وقعدت تمسح الألوان طول النهار لحد ما تعبت. ثاني يوم بصت أسمّا من الباب، لقت الناس بقوا أكثر، وكان فيهم ناس من

اللي جم إمبراح، خافت جدا لكنها برضو قعدت تشتغل طول النهار وطول الليل. اليوم اللي بعده كان الناس مالبين الشارع، وجات معاهم قطط وترايبزات وشنط سفر وكباين تليفون وبيوت. عارف يعني إيه بيت يبقى لون وشه إسود.

قعدت أسما على عتبة الباب وهي مش عارفة تعمل إيه، سألت ولد صغير كان واقف في الأول:

- هو إيه اللي حصل؟

قال لها:

الحرب.

قالت له:

- يعني إيه حرب؟

قال لها:

- وحش كبير معاه جرادل ألوان كبيرة قوي بيدلقها على الناس.

سندت راسها على إيدها اليمين وقالت:

- طب والعمل، أنا ماعنديش مية ورد تكفي كل ده.

قربت منها قطعة وطلعت على رجلها وقالت:

- إنت محتاجة مية ورد من اللي بتشفى وجع الحرب، ودي مش

حتلاقيها غير في الأماكن اللي صابها الزعل الشديد.

سألها:

- عرفني منين؟

قالت لها:

- ماما هي اللي كانت بتمسح وشوش القطط، بس لما قامت الحرب بعتننا كلنا عندك.

أخذت أسما شنتطتها وخرجت تدور على مية الورد اللي بتشفي وجع الحرب. سافرت من مكان لمكان. اكتشفت إن كل مدينة فيها بنت بتشتغل نفس شغلها ده، بس مش دايم بنفس الأسلوب. كانت منهم اللي بتقشر الوجع عن أجسام الناس زي البطاطس، ومنهم اللي بتخليهم يجرؤا مسافات طويلة وبعدين تزرع المسافات دي بالزعر اللبي يونس القلب، ومنهم اللي كانت بتستخدم طرق عنيفة للحالات الميؤوس منها، زي إنها تخلي الناس تبص للشمس لحد ما يغمى عليهم، ولما يفوقوا تدي لهم حياة جديدة وأسامي مختلفة.

فضلت تمشي لحد ما وصلت مدينة غريبة كانت بيبانها كلها مفتوحة. دخلت أسما، شافت كل الناس وشوشهم متلونة بألوان غامقة، وكان فيه ولاد صغيرين بينطوا الحبل عشان يولدوا الكهرا، ومراتب مفرودة على سطوح البيوت عشان الشمس ماتتعورش وهي نازلة، وحيوانات تايهة وواقفة فوق راسها عصافير عشان تدلها على الطريق، وكبايات بترمي نفسها من فوق الترابيزات، ومع إنها فاضية

لكنها أول ما تلمس الأرض بتكسر ويعزل منها ميا كثير. حاولت
أسمًا تتكلم مع أي حد، لكن كلهم ماكانوش بيتكلموا، لحد ما واحد
شرح لها بالإشارة إن "مافيش حد هنا بيتكلم غير الناس الكبيرة"،
سألته "طب الناس الكبيرة دول فين"، راح مشاور لها على المكان،
وبعدين سابها ومشى وهو بينهج كأنه تعب قوي من الكلام معاها.

قعدت أسمًا تمشي لغاية ما وصلت لدولاب كبير في آخر المدينة،
كانت الناس الكبيرة كلهم متعلقين على شماعات، وفي بقهم أكياس
نفتالين عشان النسيان ماياكلهمش. قربت من واحدة ست وشالت
الكيس من بقها فالست خافت، قالت لها:

- ماتخافيش أنا حافظل معاكي وماحدث حيقلدر يبجي جنبك. أنا
عاوزة أعرف فين مية الورد اللي بتشفى وجع الحرب. استغربت قوي
وسألته:

- بس إنت لسه صغيرة قوي، أmaal مامتك فين؟
قالت لها:

- ماما سابتي عشان تمسح وشوش الملايكة.
الست حضنتها، وبعدين قالت لها:

- يبقى لازم تستني للشتا، مية الورد مش بتزل عندنا غير في
الشتا.

سألها:

- هو ليه الناس هنا مش يتكلموا؟

قالت لها:

- من سنين كتير وهما كده، الموضوع بدأ إن ماحدش بقى يعمل حاجة بشغف، لحد ما النور اتقطع من بيوتهم وعيونهم زغللت، وبعدين بقى ممكن حد يبقى ماشي في الشارع يقع منه دراعه أو ودنه أو شنطة كتب أو ذكرى حلوة، وفي الآخر خالص مابقوش يتكلموا مع بعض.

سألها:

- وهما يفضلوا كده على طول؟

قالت لها:

- لحد ما يبجي الشتاء وتزل مية الورد.

قالت لها:

- بس إحنا عندنا حصل حرب، إنتوا عندكم حصل إيه؟

قالت لها:

- في مرة ولد حب بنت وخاف يقول لها.

أسمها قررت تفضل في المدينة دي وتستنى الشتاء، ولقت لها وظيفة كويسة، بقت بتعمل عرايس من الكروشييه عشان تتحط مع الأكل

فيفضل طازة، لأنها اكتشفت إن ماحدث هنا عنده تلاجة، ولما جات
تسأل واحد فيهم عن التلاجة وشه اصفر من الخضة وجري بعيد،
ففهمت.

أسما كمان بتروح بالليل عند الدولاب الكبير في آخر المدينة،
عشان تمش النسيان عن الناس الكبيرة من غير ما يضطروا يخطوا في
بقهم نفتالين، لأن ماكانش عندها غيرهم عشان تتكلم معاها. كانت
بتحكي لهم عن السمك الذهبي اللي في الجنينة، وكانوا ييحبكوا لها
عن أول مرة مطرت مية ورد، لما فجأة كل واحد بقى عنده فكرة،
لدرجة إنهم اتكلموا كلهم في وقت واحد. ساعتها الكلام عمل
سحابة كبيرة غطتهم كلهم، وطلعوا منها وشوشهم صافية
وبيضحكوا.

أسما كانت بتتمنى إن الناس في مدينتها يفضلوا محافظين على
طاقتهم لحد الشتاء، من غير ما حد يمشي في الشارع يقع منه دراع أو
ودن أو شنطة كتب أو ذكرى حلوة.

حواديت الحب

أول ما بقى عندي ست سنين جالي اختناق جامد، كان وشي
أزرق وصدري مش بيتحرك وكنت باشاور بإيدي ناحية المروحة.

أمي شالتني وجريت بيا لأقرب محل أدوات موسيقية، بس الراجل
طبطب على كتفي وابتسم وطمنها إني حابقي كويس. أمي حكّت لي
بعدها هو قال لها إيه وأنا تحت تأثير البنج. قال لها إنها مش هي
الغلطانة، الغلطان كان الدكتور الجاهل اللي ولّدي، أصله شاف مكان
القصبة الهوائية بتاعتي ناي صغير، ولاحظ إني أول ما بدأت أبكي
اختفى المكياج من على وشوش الممرضات وظهروا أجمل وأصغر في
السن وانزاحت ستاير المستشفى على الجنين وبانت الشبايبك
والجنينة والسما. الدكتور الفكرة ده عيب خلقي وشال الناي وحط
مكانه قصبة هوائية عادية! أمي سألته: طيب ليه الاختناق ده
ماحصلش إلا دلوقتي؟ الراجل ابتسم وبص لي، وقال لها إن أنا حبيت
بنت من فترة قريبة، وإن القصبة الهوائية ماعملتش أي مشكلة ليا في

الكلام العادي بس بقت خرسا وعاجزة قوي لما جيت أصارح البنـت
دي بحـي ليـها.

أمـي حـكت لي كـمان إنـها كـانت أول لـيلة أنـام فـيها بالعمـق ده، وإـني
كـنت سـاعات باتـكلم وأنا نـائم بصـوت واطـي فتـلاقـي ستـاير الشـباك
بتـزاح علـى الجـنـيـن. أما هـي فـفضـلت سـهـرانة طـول اللـيل بتـغزل أـمنية
صـغيرة عـشان أقـدمـها هـدية للـبنـت اللـي حـبـبـتها، بـشرط إـني أقـول لـها
علـى اسـمـها فـي الأول.

أنا باطلٌ عليك منك

من غير مقدمات كده، لقيت واحد سحب الكرسي اللي قدامي
وقعد على نفس الترابيزة.

استغربت جدا، كانت أول مرة أشوفه، والمطعم ماكانش زحمة
عشان يضطر يقعد مع حد مايعرفوش، وبعدين هو كان شكله
يعرفني، كان بيتسم لي بحب كأنه عارف إجابات كل الأسئلة اللي
جوايا وعنده استعداد يقولهالي بالتدريج.

سألته:

- إحنا نعرف بعض؟

قال لي:

- أنا باطلٌ عليك منك.

وبعدين سكت. استنيت أنا يقول حاجة ثانية يمكن أفهم الجملة دي، بس هو فضل باصص لي بنفس الحب كأنه طفل مستخبي عشان يتفرج على باباه وهو بيدور عليه. وبعدين بدأ يتكلم.

أنا كنت باشتغل في المطعم ده، لسه فاكِر مواعيد شغلي وقايمة الأكل اللي المفروض أعملها كل يوم. أصلاً أنا خريج سياحة وفنادق، وبابا كان شيف كبير. كل حاجة مشيت في حياتي بنوع من القصور الذاتي، عمر ما كان عندي اختيارات، ولا احترت قدام حاجة. ها، عرفتني ولا لسه؟

ماجاوبتش طبعاً، وهو كمل على طول.

لحد ما في يوم شفت بنت قاعدة على نفس الترابيزة دي. كانت بتعيط، بتعيط قوي من غير صوت كأنها فاكهة بتتعضر. ماكنتش عارف هي بتعيط ليه، بس اللي فاكِرُه إنها هديت شوية بشوية لما بصت ناحيتي. كانت جميلة وخفيفة زي سلطة الفواكه اللي باعملها كل يوم. عارف يعني إيه الأكلة اللي إنت اتعودت تعملها وتقدمها للناس تتحول لإنسان يبص لك. كنت مصدق ده جداً لدرجة إني توقعت إنها حتيجي تشكرني عشان مش باحط لها سكر زي ما المطاعم الثانية بتعمل، وعشان قلت لها مرة إن جماها في إنها تططبب على القلب التعبان مش إنها ترغزغ اللسان لمدة دقائق. فضلت البنت

تبص لي من غير كلام، وأنا باصص لها وباحاول أفكر أنا عملت طبق سلطة الفواكه ده في أي يوم.

شوية بشوية، الدوشة هديت، الدوشة بسبب المزيكا، الدوشة بسبب الشارع برا، الدوشة بسبب وجود الناس في العالم وحناقاتهم المستمرة عن مين اللي حيقعد جنب الشباك ومين اللي حياكل الكريز في التورتة. شوية بشوية بدأت أحس إني بقيت أخف، هي كمان كانت نظراتها بتقول كده، لحد ما دخلنا في انعدام وزن، انعدام وزن بجد من اللي بيخلي جمل الكلام العادية تبقى قصيدة. بقي النور بيزقنا من طريقه ويضحك، والغبار بيعمل لنا أشكال في الفراغ عشان مانحسش بالوحدة. شوية بشوية، بقينا أخف من النور والغبار، فاتحولنا لفكرتين في عقل واحد من زباين المطعم.

كلامي شكله غريب، بس إنت مصدقني.

جوا العقل ده بدأنا حياتنا الجديدة، اتعرفنا على كل الأفكار اللي ساكنين معانا، كانوا مقسمين شغلهم برضو زي المطعم. منهم اللي بيعذي الأفكار الثانية ومنهم اللي بيحرسهم ومنهم اللي بيلعب مزيكا ومنهم اللي ماسك الحسابات ومنهم اللي بيمسح البلاط. عشنا فترة طويلة معاهم، كنا بتروغ من حصص الأيديولوجيا، وبننط سور الحنين عشان نتفرج على الزمن وهو محطوط في قفص وبيتدرب على حركات بهلوانية، وبتنسحب لمسرح الخيال عشان نتفرج على العقل الباطن وهو لسه في أوضة المكياج، وبنسهر للصبح في الأحياء الفقيرة

مع الأفكار المكررة والنكت البايخة والجنان المكبوت. عقل الراجل ده كان نضيف على طول لأن النسيان كان بيعدي كل يوم يكس الشوارع، وكان مبهج عشان مسرح الخيال كان بيلاش وكان دايمًا بيقدم عروض جديدة من أماكن كثير. وأول ما نبقي لوحدا كنا نلعب.

أجل ألعابنا كانت الحيرة، أنا أقول للعقل "يلا نجري على الكورنيش دلوقتي" وهي تقول له "البس ثقيل عشان الجو برد"، ونتخايق، ونفضل نجري ورا بعض ونحبط على الحيطان ونرمي بعض بالذكريات والكوابيس لحد ما الراجل يمسك دماغه من الصداق. بعدها نتصالح، ممكن بعدها نتحول لفكرتين تانيين ونسييه واقف فجأة على باب البيت وماسك طرف البلوفر الثقيل بتاعه ويسأل نفسه أنا ليه مابقتش عاوز أجري على البحر.

فجأة يلاقيني باقول له يشتغل صياد، وهي تقول له يحب بنت سمرا، ونتخايق تاني. عشان أنا مش عبيط، وعارف إن اللي يحب بنت سمرا مش ممكن يسيبها ويروح للبحر. نفضل طول الوقت نلعب ونتخايق، ونعمل صداق، صداق جميل يخليك تسمع صوت دوران الكوكب اللي جواك، واللي بتنساه طول الوقت وسط دوشة الكوكب اللي برا.

الراجل كان ساعات بيتضايق مننا، كان بيعيب لنا وقتها "أسيرين"، دي شركة بتبع ناس يرشوا العقل بغاز ريحته وحشة قوي

شبه ريحة الأحكام المسبقة. كنا بنجري نستخى في الخوف عشان هو المكان الوحيد اللي مش بيوصل له الغاز. وساعات كان بيحب لنا "قهوة"، ودي عصابة من البلطجية بتيجي تهدد الأفكار كلها عشان تدخل بيوتها وماحدش يمشي في العقل غير الأفكار الأغنيا بس. كنا ساعتها نمشي وإحنا مشكين دراعاتنا في بعض بغرور لدرجة إنهم بيفتكرونا أغنيا ويسيبونا نعدى.

وفي يوم وإحنا بنلعب سمعنا دوشة جامدة، خبط جامد على كل البيان، الأفكار كلها جريت تستخى ما عدا إحنا الاتنين. البيان اتكسرت من الخطب، وهجمت علينا أفكار كتير جاية من برا، أفكار معاهم سكاكين وعصيان ونصايح، كانوا بيصرخوا ويبدؤوا على سبب الصداق اللي بيعجي من وقت للتاني. ماعرفناش نجري ولا نعمل إيه، بس ماكانش فيه فرصة للجري أصلا، لأنهم عرفونا بمجرد ما شافونا. فكرتين عكس بعض واقفين في نفس المكان وماسكين إيد بعض. وقتها أنا كنت "ونفرش ضينا.. على ضلة بعضنا" وهي كانت "ورا كل شباك ألف عين مفتوحين". حاصرنا الأفكار الغضبانة، لقيتني أنا كمان باصرخ زيه، أصل الراحل الغبي فاكر إنهم بعد ما يخرجونا حيخرجوا هما كمان ويسيبوا عقله رايق وهادي زي الميا على الرخام. ما يعرفش إنهم حيحتلوا الأماكن اللي كنا بنحب فيها بعض وحيفضلوا يتخانقوا بمجد ويموتوا بعض، والدم حيغرق كل مكان والأفكار حتبقى كلها مستخية وخايفة تطلع، ويمكن حتى تخاف تحب هي كمان.

فضلنا واقفين وأول ما قربوا منا حضننا بعض، بقينا فكرة واحدة "إحنا مش كواكب بتدور، إحنا نور بيسافر". وقفوا كلهم مرة واحدة وأسلحتهم في أيديهم بتهز، ماكانوش مصدقين إزاي فكرتين عكس بعض يحضنوا بعض ويفضلوا عايشين. فضلوا واقفين بيتفرجوا علينا وإحنا بنعدي من وسطهم، ذراعي حوالها وذراعيها حواليا. كانوا خافين ويبصوا بعيد كأنهم لو جات عينيهم في عيننا ممكن يتحرقوا فوراً ويتموا في سلة النسيان. مشينا لحد ما وصلنا للباب وخرجنا، طرنا إحنا الاتنين / الواحد وسط النور والغبار لحد ما نزلنا في عقل شخص تاني. الشخص الثاني ده هو حضرتك.

أنا حيت أتكلم معاك شوية في الأول عشان الأفكار اللي في عقلك كانت طيبة جداً معانا وعاملتنا بمودة ماشفناهاش قبل كده.

بص بقى، إحنا بنجيب صدا، وبنلخبط كل ترتيب ممكن تكون عامله جوا، ومانقدرش نضمن لك إننا نساعدك تاخذ قرارات، أو حتى نسيبك تاخذ قرارات. لو بتخاف، قول عشان نغشي من دلوقتي. ولو ناوي تجيب أفكار من برا عشان يطردونا، نصيحة بس خليههم يعدوا في الأول على البوابة الإلكترونية اللي في قلبك، عشان تتأكد إن مش معاهم سلاح. صدقني مافيش أسوأ من أفكار غريبة مسلحة بتتحرك جوا عقلك. شكراً، أنا لازم أمشي.

خلص كلامه وقام، مشي ناحية الباب، كانت مستياه بنت لابسة
فستان إسود وحاطة وردة بيضا في شعرها. خدت بالي وقتها إنه كان
لابس قميص إسود وبنطلون أبيض. حطت دراعها في دراعه ومشوا،
والغريب إن ماكانش ليهم ضل، وكان غبار الشارع بيعدي جواهرهم
كأنهم ضرفتین لشباك مفتوح.

احترت فيهم جدا، يا ترى ممكن أقبل حاجة زي كده ولا
أرفضها. فكرت إن أنا كمان عمري ما جربت "الحيرة" اللي يقولوا
عليها دي، وخفت من كلامه عن الأفكار الغريبة المسلحة. يا ترى
الأفكار الغريبة دي ممكن تكون موجودة هي كمان حواليا على
تراييزات تانية، وممكن واحدة منهم تيجي تقعد قدامي هي كمان،
بس طبعا مش حستنى عشان تحكي لي كل ده، أكيد حطلع
مسدسها وتوجهه ناحيتي من تحت التراييزة وتطلب مني مفتاح عقلي.
حسيت إني تعبت من التفكير، ومسكت دماغي من الصداع. وفجأة
ابتسمت، واضح إن الفكرتين اللي ييجوا بعض ماكانوش مستنيين
إجابتي.

لما البنت رجعت من الحرب

لأنها كانت أول مرة يخرج فيها الحنطور لوحده، ماكانش عارف يروح فين، هو كان عاوز يروح للمكان اللي فيه العربيات الطبية، اللي بتعالج الناس من مرض الطريق، بس هو كان يقدر يعالجهم من غير الأعراض الجانبية اللي بتيجي من القعدة فترة طويلة في مكان مقفول بقزاز. دخل الحنطور أول بيت قابله لكن المدرعة خبطته وهي داخلة بسرعة. ما حشش بحاجة بعدها.

لما فاق لقي نفسه نايم في أوضة كبيرة، وحواليه مدرعات كتير بتبص له، خاف قوي، لكن واحدة منهم قربت منه وقالت له:

- إنت كويس؟

فهم الخطور إنما هي اللي خبطته، واستغرب من قلقها لأنه كان فاهم إن المدرعات مابتخافش زي باقي العربيات.

قال لها:

- أنا فين؟

قالت له:

- ده بيت المدرعات، ماحدش بيدخله غيرنا، عشان كده كنت داخلة بسرعة. إنت أول مرة تيجي هنا؟

قال لها:

- أيوه.

قربت منه مدرعة كانت واقفة قدام السرير بالظبط والباقي حوالها، كانت لابسة على عينيها وعلى كشافاتها شبك حديد عشان ماحدش يقدر يهرب من نظراتها ليه. كانت مديرة البيت وكانوا بيسموها العميد، وكانت بتتكلم بأقل عدد ممكن من الحروف زي طلقات المدفع النص بوصة، قالت:

- المدرعة "بؤرة" تسببت في إصابتك، تقدر تفضل هنا لحد ما تبقى كويس، وتقدر تمشي. وإحنا حنقوم باللازم. الخطور ماكانش فاهم حاجة من الكلام ده، ماكانش فاهم حتى هو لصالحه ولا لأ. لكنه حس إنه عاوز يمشي. حاول يتسند على الحيطه ويقف لكنه

اكتشف إن العجلتين اليمين مكسورين، فرجع نام ثاني على ظهره،
أما العميد فبصت لـ "بؤرة" بنظرة تهديد، ومشيت ووراها باقي
المدرعات، ومافضلش غيرهم هما الاتنين.

بؤرة قالت:

— أنا آسفة.

قال لها:

— هو ليه البيت ده ماحدث بيدخله غير المدرعات؟

قالت له:

— لأن العربيات الثانية بتخاف. كلهم بيقولوا إننا ماعندناش قلب.
تصور إنهم بيستغربوا لما يلاقوا واحدة مننا وقفت في الإشارة، أو
بتدي إشارة يمين أو شمال قبل ما تحود، مع إننا بنضحك وبنرقص
وبنحب زيههم.

قال لها:

— يعني إنتي عمر ما حد حبك قبل كده؟

قالت له:

— يمكن لو حد شاف فيا حاجة ثاني غير المدفع النص بوصة، كان
ممکن يقول لي إنتي أجهل من غير السلك الشايك، أو حتى يفتح معايا
كلام عن الفرق بين ألوان المدرعات.

قال لها:

- طب إنتوا ليه بقيتوا كده؟

طففت كشافاتها وقالت له بصوت واطي:

- إحنا كنا عربيات عادية، بنحب وبنبات في بيوت العربيات
وبنعالج الناس من مرض الطريق زيهم، لكننا دخلنا الحرب.

قال لها:

- يعني إيه حرب؟

قالت له:

- وحش كبير بيكسر ضلوعك، ويحط مكافهم درع حديد، فيه
مننا كتير ماتوا من التكسير أو من صدمة تركيب الدرع، واللي فاضل
مننا قعدوا فترة طويلة مش بيضحكوا، ولما يتكلموا يطلعوا سارينة
عالية، ولما يتخفقوا في الزحمة يتنهدوا قنابل غاز. لحد ما العربيات
خافت مننا ومابتتش نبات معانا في نفس البيت.

مع الوقت كان الخطور يحاول يتسند على الحيط شوية وعلى
بؤرة شوية عشان يعرف يمشي، ولما العجلتين اليمين اتصلحوا شوية
بقوا يطلعوا مع بعض يتمشوا حوالين البيت. العربيات كانت مستغربة
المشهد جدا، إزاي الخطور مش خايف وهو ماشي جنب المدرعة
المرعبة دي، لدرجة إن فيه عربية قربت منه وسألته إذا كان مقبوض

عليه ولا حاجة، راحوا ضحكوا قوي هما الاتنين. وبعدين بدؤوا
يضايقوهم، بشكل غير مباشر طبعاً، زي إن مجموعة عربيات يتجمعوا
ويقعدوا يلقوا في دواير صغيرة "خمسات" عشان يفكروها إنهما
مابتعرفش ترقص.

بؤرة كانت بتضايق فعلاً، بس كانت بتكتم قبلة الغاز على آخر
لحظة وتكمل مشي.

وفي يوم لاحظت بؤرة إن الحنطور بقى يمشي كويس، وبقي
ساعات يسبقها من غير ما يحس لكنه بيرجع تاني ويعمل لسه تعبان.
وكان بيحب لها مزيكا ويقعد يغني معاها وسط العريبات، حتى الولاد
الصغيرين اللي كانوا بيتشعلقوا عليه كان بيديها منهم شوية، ويقول
لهم:

ما تخافوش دي أطيب من القطر البلاستيك. ولما خرجت معاها مرة
من غير السلك الشايك قال لها إنها جميلة لدرجة إن إشارات المرور لما
تشوفها تحتلي التلات دواير لوهم أخضر..

يومها مشوا كثير لحد ما بترين بؤرة قرب يخلص، بس الحنطور
كان حاسس إنها لسه عاوزة تمشي، راح مسك إيدها وشدها معاها،
كانت خفيفة زي عجلة بتلات عجالات.

فضلوا ماشين لحد ما راحوا آخر المدينة، وقفوا قدام الصحرا
الواسعة وسكتوا، وبعد مدة قالت له: لما حاولت أرجع لطيعني سألت

العميد أعمل إيه، قالت لي مافيش غير البراح هو اللي يقدر يساعدك، قلت لها يعني إيه براح، قالت لي فطاطري ببيل القلب ويفرده زي العجينة فيبقى واسع، واسع وطري، ماحدش يتعور لما يجبط فيه. بس خدي بالك، مش حينافوا منك بعد كده.

الخنطور سألها:

- إنتوا ليه عاوزين العربيات تخاف منكم؟

قالت له:

- عشان إحنا قبل الحرب كانوا بيعضايقونا كثير زي باقي العربيات، اللي يكسر علينا واللي يقف قدامنا فجأة، ده غير الكماين اللي بيعملها البوليس عشان يشخبطوا على القزاز، والحرامية اللي بيحاولوا يفكوا الدرع الحديد ويسيبونا مكشوفين. أغلبنا قرر يكمل زي ما هو، حتى أنا، خاصة إن البراح بعيد، والبترين عمره ما يكفي إننا نوصل.

الخنطور لقي نفسه بيتعرش، رعشة غريبة كده فيها خوف وانبساط، فيها جريمة لازم تحصل وحلم جهيل مش لازم يتحقق، جريت بؤرة في قلب البراح لوحدها، بآخر شوية بترين معاها، وفضلت تلف في خمسات كثير بخفة كأنها مش شائلة درع حديد مكان ضلوعها، وقف الخنطور يتفرج مش عارف يعمل إيه، ووقف البراح يلبس المريلة بتاعته، ويتسم.

لما الولد رجع من الحرب

لما كنت في الحرب جات لي رصاصة في قلبي، لكن العساكر في المستشفى الميداني ماكانوش متعودين على النوع ده من الإصابات، عشان كده بدل ما يشيلوا الرصاصة شالوا قلبي، وسابوا الرصاصة في مكانها. ومن ساعتها وأنا كل ما أقع في الحب تطلع كلمة باحبك سريعة وسخنة زيادة عن اللزوم، لدرجة ممكن تقتل اللي باحبه.

ولأن أصوات الرصاص كانت معتادة في الحرب، كنت باقضي أغلب وقتي في المعسكر. كان كل زميلي بيحاولوا يهربوا عشان يتعرفوا على بنات يرقصوا معاهم ويقولولهم كلام بصوت واطي، وكنت أنا بافضل لوحدي طول الليل في ميدان الرماية، أكتب اسم حبيتي الوحيدة على جذوع النخل، وأصارحها بكل المشاعر اللي

بتوجعني، وبعدين أنزل ألم الفوارغ من الميدان وأدهن قلبي بالهوا
الساقع لحد ما يلمع، عشان ماحدش ياخذ باله في طابور الصبح.

وفي كل مرة لما أتجمع مع زمايلي في تمرين الرماية، كنت باكتشف
إني نسيت أمسح اسم حبيتي الوحيدة من على النخل، وكنت
باستغرب إن كل رصاصة تيجي على الاسم كان بيوضح أكثر
وبيوسع كأنه بيتسم. كأن كل كلام الحب بيخلي الحبيب بيتسم
مهما كان سريع وسخن زيادة عن اللازم، ويوجع.

وفي يوم قررت أروح لدكتور، سألت كل الدكاترة قالوا لي لازم
تلاقي دكتور متخصص في القلوب اللي بتدق بعيد عن أصحابها. بس
ماكانش حد عارف هو ممكن يكون فين.

فضلت أدور في كل مكان، وأسأل كل الناس اللي كانوا عيانين
بأمراض شبيهة. سألت العساكر اللي بيحرسوا أماكن مهجورة،
والمطربين اللي بيغنوا لجمهور نايم، والبنات اللي بيكتبوا كلام دافي
على فيس بوك ماحدش ممكن يفهمه غير شخص واحد معمول له
بلوك. لحد ما لقيت واحد لابس جلابية بيضا فيها أجزاء غامقة وفتحة
وبتتحرك زي حركة السحاب. كان مغمض عينيه وبيطوف حوالين
كولدير ميا محطوط في الشارع، ويقول كلام بصوت واطي ماقدرتش
أحدده. ولما سألت قالولي إن هنا كان مكان جامع ولي من أولياء الله،
لكن الحكومة هدت الجامع ونقلت الضريح ومدت شارع وبنّت

عمارات، وهو مش عاوز يبطل يطوف ولا حتى يروح مكان الضريح الجديد. ولما حد يحاول يكلمه مايرضاش يرد عليه أو حتى يقف. فتحت حنفية الكولدير وشربت، وقف الدكتور فجأة وبص لي وقال:

- إنت مش خايف مني؟

قلت له:

- إحنا نعرف بعض، أكيد الشخص اللي أخذ قلبي زار الضريح في يوم من الأيام، وقابلتك.

طلب الدكتور مني إني أنام على الأرض وأفتح قميصي، رش شوية ميا من الكولدير على أجزاء من صدري، وفجأة لقيت شريط ورق طالع من الكولدير يشبه ورق رسم القلب، بس ماكانش مرسوم عليه بحر زي باقي الناس، كان مرسوم ولد قاعد على مرجيحة، طالع ونازل وملاحه مش باينة.

بص الدكتور في الرسومات وقال لي:

المرجيحة ده أصعب الأنواع. واضح إن إصابتك كانت خطيرة. عموما ما فيش قدامك غير إنك تدور على حد رسم قلبه مرجيحة هو كمان. سألته:

- وده حاعرفه إزاي؟

قال لي:

— حتلاقيه خفيف، خفيف جدا بس مش خايف.

بعدها بقيت ماشي باجر الكولدير في الشوارع، وباطلب من كل واحد أقابله إنه يشرب شوية ميا، ويقول هو رايح فين. ساعتها كانت بيطلع شريط الورق عليه رسم القلب بتاعه. كان منهم اللي قلبه مصنع حديد، واللي قلبه قطر ملاهي، وكان فيه المراكب الورق والمساطر البلاستيك وأبراج الحراسة ولوحات الإعلانات والرقصات الهادية. بس مالمقيتش المرجيحة عند حد.

المرض كان زاد عليا قوي، بقيت باوجع أي حد بكلمة باحبك، وبعد فترة كان لازم آخذ بالي إني ماقولش أي كلمة حلوة لحد، حتى لو كانت شكرا أو لو سمحت أو لون عينيكي جهيل في الشمس. مش بس كنت خايف أوجع الناس، لكن كمان كنت خايف أتفضح ومأحدث يتكلم معايا بعد كده، وماقدرش أوصل للي أنا بادور عليه. كنت باكتم وأستنى أذان الفجر، وأقول كل الكلام الحلو اللي جوايا للسما. كان الدكتور قال لي إن في الوقت ده مافيش حد صاحي غير الناس اللي بتعرف تفرق بين رصاصة الحب ورصاصة الأذى، وكلهم بيعتروا الخوف ويعفظوا السر.

بعد فترة طويلة لقيت نفسي تعبت، قعدت على الرصيف وقدامي الكولدير، كنت خلاص ينست، حتى لما كنت باتطمئن على رسم القلب بتاعي كنت بالاقى المرجيحة بتتحرك ببطء كأنها شائلة ألف

ولد. في مرة سألت الدكتور عن الموت، قال لي يبيجي لما الولد يزهرق
ويتزل من المرجيحة، ويتحول رسم القلب لخط ساكن زي مية البير.

وفجأة لقيت الكولدير بيتهز قوي، خفت وبصيت حواليا، كانت
بتعدي بنت راكبة عجلة وشعرها معمول ضفيرة طيارة وراها، وفوقها
سحابة صغيرة راكبة عجلة هي كمان ويتمطر عليها هي لوحدها،
ندهت لها، لقيتني باقول "مرجيحة". وقفت البنت، وقفت السحابة.
بصت لي البنت وابتسمت، مدت السحابة ضلها لحد ما غطاني أنا
كمان. نزلت البنت من العجلة وركبتها جنب الرصيف، ركنت
السحابة العجلة فاتحولت لمطر خفيف ووقعت علينا. قربت البنت مني
من غير ما تتكلم، مدت إيدها جوايا، طلعت الرصاصة ومسكتها
بأيدها، كانت سخنة جدا وبتطلع دخان إسود كأنها لسه مضروبة
دلوقتي، رمت الرصاصة ناحية السحابة، اتحولت السحابة لريش،
ريش كثير ملا السما ونزل علينا بشويش، بعدها نورت السما فجأة.
مسكت البنت ريشة صغيرة وحطتها جوايا.

سألني:

- فاكّر حاجة؟

قلت لها:

- مش فاكّر غير إني كنت سحابة طيارة لحد دقيقة فاتت، هو

حصل إيه؟

كانت لسه بتبتسم، ابتسامتها فيها خفة وأمان زي عوامة طافية
على البحر. ركبت البنت العجلة بتاعتها ومشيت. اهز الكولدير
أكثر وطلع منه شريط ورق مرسوم عليه ولد وبنت طاييرين على
مرجيحة بتتحرك عالي قوي كأنها حتطول السما.

التعب

زمان، كان التعب بواب على جنينة كبيرة مزروعة بالليمون، كان المكان الوحيد اللي فيه ليمون، وكان كل الولاد والبنات بيتجمعوا بالليل عشان ييصوا على النور اللي بيطلع من الليمون ويغسل الشجر ويوصل للسما. كلهم كانوا نفسهم يدخلوا يقطفوا الليمون، أو حتى يتفرجوا عليه من قريب، بس ماحدث قدر يواجه التعب. كل اللي كانوا يقدروا يعملوه إنهم يجروا لحد ما يوصلوا قدام باب الجنينة، وفجأة يلاقوه قدامهم، لابس جلاية واسعة لدرجة إنهما لما تتفرد في الهوا بتداري كل حاجة وراها، وفوق الجلاية درع من سلاسل حديد، وفي إيده شومة ثقيلة ليها راس حديد، يا دوب بيلف الشومة في الهوا فوق دماغ الواحد، يدوخ ويقع على الأرض ويتدحرج لحد ما يرجع بيته تاني.

وفي يوم، طلع ولد وبنت فوق سطح بيت علشان يتفرجوا على الليمون. كان الولد عطار وكانت البنت حلوة، والعطار هو أسرع واحد بيقع في الحب لأن حواسه صاحية طول الوقت. الليلة كانت مناسبة جدا لحدوتة حب لكن الولد ماعرفش يبدأ، حاول يقرأ لها شعر، وفجأة في وسط القراية نور الليمون، طلع النور الخفيف لفوق زي بخور الجوامع، زي عيدان لبلاب شفافة، زي ملايكة طيبين. اتعلقت بيه عينين البيت.

فقال الولد:

"يطير الحمام.. يحط الحمام.."

أعدي لي الأرض كي أستريح.. فأني أحبك حتى التعب"

قالت له وهي لسه سرحانة:

- يعني إيه؟

فكر الولد شوية وبعدين قال لها: قلبي زي حمامة، يطير لما يشوفك، ويحط لما يشوفك، إنتي سماه وأرضه، لأنك زي السما متاهة واسعة مليانة حاجات بتتور، وزى الأرض مليانة أسرار مكتومة واللي يدخل جواكي بيلاقي ذهب لكن اللي يدخل أكثر بيلاقي نار.

أعدي لي الأرض، يعني احضيني عشان قلبي يطل يخبط على ضلوعي زي ما يخطط المسجون على شباك زنزانته، وأنا باحبك

لدرجة إني ممكن أغلب التعب وأقطف لك الليمون. قالت البنت:
محمود درويش ده كداب كبير، معقول فيه حد يحب لدرجة إنه
يغلب التعب؟

سكت الولد والبنت والشعر، وفضلوا ساكتين لحد ما النهار طلع
والليمون انطفئ.

استنى الولد ليوم العيد، عيد ميلاد الملاك اللي أكل من الطبق
القاضي. ماحدش عارف اسم العيد ده جه منين، بس الحكاية بتقول
إن في اليوم ده بتقدر تبعد عن الأرض كل ما قل وزنك، يمكن ثواني
أو ساعات، ويمكن حتى اليوم كله. كانت الناس دايمًا بتصوم اليوم
ده، وبتشيل تليفوناتها وتبيع بيوتها وتقلع هدومها عشان تكون أخف،
ومع ذلك ماحدش قدر يطير أكثر من ثواني.

بعد الولد عن الناس، قلع هدومه، فتح صندوق صغير، كان مليان
بعلب صغيرة مليانة وصفات، كان بقاله شهور يحاول يحضر وصفة
بتمسح الذاكرة. طلع الوصفة، حط منها شوية على ميا مغلية، وبعدين
قعد ينط ويلف في الهواء. لقي الولد إنه مع كل نطة بيرتفع أكثر، فضل
يحاول ويحاول. لحد ما شافه، هو بنفسه، التعب، كان واقف بينط هو
كمان لفوق، ومع كل ثانية بيعدها عن الأرض كان بيضحك،
ضحكة عريضة محتلطة برنين الدروع بتاعته وحفيف أطراف هدومه
في الهواء، ماحدش شافه بيضحك قبل كده، ماحدش شافه أصلا، هو

طول الوقت قدام باب الجنينة، مش بيتكلم مع حد ولا بيسمح لحد بالدخول. كان وشه لسه شاب، وكان بينط بحماس كأنه في مسابقة. قرب الولد منه، اتخض منه التعب لما لقاه طاير أعلى منه، حط إيده على الشومة من غير كلام.

لكن الولد قال له:

- حطير إزاي بالدروع دي كلها؟

قال له:

- أنا كل سنة باختر أبعد مكان، عشان ماحدش يشوفي، إنت

جيت إزاي؟

اتخض الولد من صوته لدرجة إنه وقع على الأرض، فضل باصص له وهو واقع، وقام ببطء وهو لسه باصص له. "ده صوتي أنا، صوتي بالظبط بس متقطع شوية وبينهج ويوطى ساعات كأني باداري على مصيبة".

قال الولد:

إنت عاوز تطير ليه؟

قال التعب:

- إنت عاوز تطير ليه؟ قال الولد: مش فاكرو. يمكن بالعب

وخلص.

ضحك التعب، ضحك الولد، طارت الضحكة بالولد لحد السماء كأنه بالونة هيلوم، التحولت الضحكة لصرخة فرح وهو ييلف في الهوا من غير ما يتزل، إزاي ده حصل، حرك الولد ذراعاته ولف حوالين المدينة كلها، ناس كثير كانت بتشاور له، وبينادوا اسمه اللي مابقاش فاكهه، وشاورت له بنت مش فاكهها في بلكونة بيت مش فاكهه، البيوت تحته بقت مكعبات ملونة هشة كأنها بيوت لعبة، وطابور العساكر بأسلحتهم المخيفة بقى زي قطع غزلان بيترعش ولازق في بعضه عشان مايدش فرصة للصيادين، والقطر الضخم اللي بياكل الناس كل يوم بقى زي طفل خايف بيجري ويدور على باباه. جريت المدينة تحته لحد ما رجع للتعب. كان لسه بيحاول يطير، شده الولد من ذراعاته وقال له: لو مش حتقدر تطير بسبب دروعك، أنا حاساعدك..

اتعلق التعب في ذراعاته وطلعوا مع بعض، الدروع صلصلت بصوت مخيف سمعته المدينة كلها، والهدوم اتفردت حواليه عشان تستقبله لو وقع. فكر الولد إن التعب هو الوحيد اللي بيفكر في الوقوع طول الوقت، عشان كده صعب يطير. سأله التعب: إنت عملت كده إزاي؟ قال له: أنا عطار، وعندي وصفة بتمسح الذاكرة. هز التعب راسه يمينا وشمال وقال: كلام فارغ، أنا بقالي هنا ألف سنة فوق ألف سنة، ماشفتش حاجة ممكن تعمل كده إلا الحب.

لما طلع النهار كان الولد نائم على الأرض جنب صندوقه، نفص
هدومه ومشى، عدى على باب الجنية فلقى الباب الكبير مقفول زي
ما هو، والتعب واقف قدامه بجلايته ودروعه وشومته وسكوته.
قابلوه الناس بالتصقيف والأحضان والأسئلة، كلهم كانوا عاوزين
يعرفوا الوصفة اللي عملها وخلته يطير طول اليوم. كان مفعول
الوصفة انتهى، لكن دماغه كانت ثقيلة قوي كأنه افكر كل حاجة
مرة واحدة. ولما عدى قدام بيت البنت لقها مستياه في البلكونة
بابتسامة واسعة، أوسع من التصقيف والأحضان والأسئلة بتوع أهل
المدينة كلهم. لكن الابتسامة دي دبلت فجأة لما بصت على إيديه
لقيتهم فاضين، نسيها الولد ونسي وعده اللي وعده بقلبه. دخلت
البلكونة بغضب وقفلت الباب.

وقف الولد قدام بيت البنت لحد ما الليل دخل والليمون نور،
خرجت البنت وقفت قدامه من غير كلام، مسك الولد إيدها ومشىوا
من غير كلام، فضلوا ماشين وسط الشوارع الفاضية، كل الناس
فوق سطوح بيوتهم بيتفرجوا على الليمون، مشىوا لحد ما قربوا من
باب الجنية، دق قلب البنت بسرعة، الباب الكبير مقفول بيأس كأنه
حب من طرف واحد، لكن التعب مش هنا، يا ترى راح فين.

مد الولد إيده اللي ماسكة إيدها، وزق الباب بالراحة، ضحكوا
هما الاتنين بصوت عالي، انفتح الباب قدامهم بخفة كأنه ستارة حرير،
ونامت الجنية الواسعة في عيوئهم، الشجر أثمر وطيب زي أحزان

قديمة، والليمون لاذع زي أفكار جريئة، والنور طالع منه زي بخور
الجوامع، زي عيدان لبلاب شفاقة، زي ملايكة طيين. اتعلقت بيه
عيونهم، ومن وراهم اتقفل الباب.

طلع النهار ومارجعوش الولد والبنت، نزلوا الناس يدوروا عليهم
في كل مكان، لفوا المدينة كلها من غير ما يلاقوهم، وكل ما كانوا
يعدوا قدام باب الجنية يشوفوا الباب مقفول والتعب واقف قدامه
فيهزوا كتافهم ويقولوا مش مقفول. ومن يومها وهما طول النهار
يدوروا عليهم، وطول الليل يسهروا يتفرجوا على الليمون، اللي
نوره بقى أعلى، وبقي ساعات يكمل لأول ساعة من النهار، لكن
طبعا ماحدث لاحظ ده غير الولاد البنات الل بيقروا شعر فوق
سطوح البيوت، لأن اللي بيقروا شعر بتبقى حواسهم صاحية طول
الوقت.

حواديت الضل

أول مرة ركبت المترو لوحدي، كانت أول مرة أبص على الناس مش على الشوارع اللي بتجري ورا الشباك. كان فيه ناس كتير مايعرفوش بعض، واقفين وقاعدين ساكتين لحد ما تيجي محطة فيزلوا شوية ناس ساكتين ويطلع ساكتين جداد. كانوا مستنيين حاجة عبقرية تحصل، ممكن حد يطلعها من جيبه فالناس كلها تشارك وكل واحد يطلع "تعليق" من جيبه ويقعدوا ياكلوا مع بعض، ويمكن تعدي بسرعة ورا الشباك فتعلق عينيهم بالقزاز زي نقط المطر، ويمكن حد يقرأها في الجرنان بصوت عالي فتحول لشجرة صغيرة تكبر وتتفرع لحاجات عبقرية تانية كتير. ساعتها حيتكلموا كتير وحيكتشفوا إنهم مليونين حواديت ومشحونين بالرغبة في الكلام وإنهم قريبين من بعض جدا لدرجة إن لو حد منهم ميل على جنب حياقي كذا واحد ميل

على نفس الجنب. بعدها حيتبادلوا الأسماء وأرقام التليفونات ويمشوا وكل واحد شايل في محفظته حاجات كتير يفرج أصحابه عليها.

بس هما مش عارفين إن ده مش حيحصل، عشان أنا ماقلتش لحد إني شفته، الضل اللي بيطلع العربية ورا كل واحد منهم يسرق محفظته، وبعدين يختفي. ولا قلت إني شفت في يوم كتير منهم، يبجي عشرين أو ثلاثين ضل، في شارع جانبي ييفتحوا المحافظ ويقسموا اللي فيها ما بينهم، ويعملوا مراكب بتكلم وبالونات بتكبر من غير ما تكون مسدودة وهدوم بتتور في الضلعة وشجر يطرح ضحك ومشاعر مش بتفهم غلط، ويلعبوا ويعملوا دوشة عالية، لحد ما يخلصوا اللي معاهم فيتجمعوا من جديد قدام محطة مترو مستنيين الناس اللي حتركب.

دولاب أزرق كبير

عارف يا طاهر إنك عاوزني أحكي لك حدوة الدولاب، أنا نفسي أحكيها من زمان عشان تاخد بالك، بس فيه حواديت ماينفعش تتحكي غير وإنت مش بتسمع، عشان كده حاحكي لك الحدوة دي وإنت نايم.

أنا كنت قلت لك إننا زمان كنا عايشين في مكان جميل جدا، مساحة شبهنا بتكبر لما بنقضي فيها وقت أطول، وبتتلون لما نتكلم عنها مع حد. كنا عايشين قريب من بعض جدا، لدرجة إنك ممكن تكلم اللي إنت عاوزه وإنت في مكانك، وكلامك يمشي يدور عليه ويحبط على الباب ويستناه كمان لو مشغول.

كان الغنا بيوقفنا صف، والزعل بيوقفنا طابور، والحب بيرصنا في دواير. وفضلنا على كده سنين.

وفي يوم قرر واحد إنه يسكن بعيد، بعيد عن بيوتنا اللي حاضنة بعضها كأنها ورد على سور جنينة. صحينا الصبح لقيناه شايل بيته وماشي من غير ما يسلم على حد. ماحدش كان فاهم ليه، وهو ماقالش. وقتها كان القانون بيعاقب على كتم العتاب بالحرمان من الطبطة، عشان كده ماحدش كان قادر يروح يسأله. قعد يمشي لحد ما بعد قوي، وبعدين لقيناه حط مصايد صغيرة قدام الباب عشان يمنع الكلام إنه يقرب منه، كل مصيدة فيها كلام مش مفهوم أو دموع طازة. كان واضح جدا إنه مش عاوز حد مننا يروح له. فضلنا نتفرج عليه من بعيد، بعد كام يوم لقينا صوايع إيديه كلها التحت مع بعضها، لدرجة إنه مابقاش قادر يشتغل أو يلعب بيانو أو يشبك إيده مع حد.

بعدها كلامه مابقاش يوصل لحد، بقي يبطلع في صورة عرق على جسمه وبعدين يتبخر. وخطوته بقت ثقيلة قوي، كأن رجله بتلرز في الأرض. جلده كمان لونه بدأ يتغير، بقي بيرد شوية بشوية ويتحول للأخضر. لحد ما في يوم بصينا عليه لقينا قدام البيت شجرة لوها أخضر غامق وفروعها طارحة موبايلات ذكية، وهو اختفى.

فضل الموضوع ده يتكرر كثير، كل كام يوم واحد ياخذ بيته بعيد من غير ما يتكلم مع حد، ونفضل نتفرج عليه لحد ما نشوف الشجرة الغامقة. وهكذا.

ولما جه الربيع، لقينا الموبايلات الذكية كلها بترن، بترن يالحاح وبصوت عالي لدرجة إن الشجر الغامق كان بيتهز كأنه أطفال مرعوبة، وبعدها بدأت الحشرات تطلع.

حشرات كثير صغيرة خرجت من الشجر ده، وزحفت ناحيتنا، انتشرت في الشوارع كلها. كانت بتدخل في الهدوم وتمشي على المطابخ وتلم على أي شوية ونس متساين في الضل.

كانت بتدور على أي واحد قاعد لوحده، ولما بتقرصه بتخليه يحس بسقعة ملت الجو فجأة. يجري على بيته يلاقي السقعة مستياه، يلبس هدوم الناس اللي بيحبها يلاقي ريحة غياب، ويدور في الأدراج كلها على أدوية مايلاقيش غير ذكريات ساقعة. يفضل في البيت مش عاوز يخرج ولا يفتح الباب لحد. لحد ما جلده يخضر هو كمان.

حاولنا نواجههم بأي طريقة. شغلنا أغاني في البلكونات ونزلنا الشارع نرقص، شربنا نسكافيه عشان ييفتح النفس على المشي، وأكلنا بيتزا عشان الأكل المدور بيخلي كل حاجة في الدنيا مدورة من غير حواف مؤذية. بس كل ده ماجابش نتيجة، كانوا طول

الوقت بيدخلوا من شقوق الحيطان والموبايلات الذكية والجنائن
الفاضية.

خفنا، كلنا سبنا بيوتنا وطلعنا نجري، كانت الحشرات بتطاردنا
ورنين الموبايلات بيكعللنا وإحنا بنجري. وكنا كل ما نبعد نلاقي الجو
بيبقى أبرد، وعدد الحشرات بيقل عشان الأكل بيقل. لحد ما وصلنا
لمكان متغطي بالتلج، فيه دولاب أزرق كبير شبه الهيكل العظمي.
كان المكان الوحيد البعيد عن الحشرات.

حاولنا نستخبي في الدولاب ده. كان متقسم لرفوف كثير
متساوية. رفوف صغيرة قوي ماتشيلش واحد وضحكته، وزواياها
الحادة بتتخاق مع جسمك لحد ما يسمع كلامها وبياخذ شكلها.
وكان يفصل بين الرفوف قزاز متين، في الأول كان طيب، بس بعد
كده بقى بيكهربنا لو حاولنا نلمس بعض. الجو كمان كان برد جدا
لدرجة إن الكلام كان بيتجمد وهو طالع، والأفكار ماكانتش بتولع
كويس بسبب الرطوبة اللي في دماغنا، والهدوم ماكانتش بتتشف من
الحزن لما بتتغسل، فكنا بنضطر نلبسها زي ما هي.

عدت علينا سنين كثير وإحنا بنحاول نتعود، بس حتى التعود في
الأول كان طيب، وبعدين بقى بيتأخر بالقصد وبياخذ فلوس
وحواديت عشان ييجي، وإلا حيسينا للزوايا الحادة تتخاق مع
أجسامنا. كنا خايفين لأن حواديتنا مع الوقت كانت بتتخلص، وكنا

ساعات بناخذ حدوتة واحدة نتعشى بها كلنا، كل واحد بياخذ حنة صغيرة، ويخلطها مع رغي كثير وعيش بايت عشان حجمها يكبر ويقدر يشبع. أكيد ماكانش بيبقى ليها طعم، أصلا ماكانش حاجة ليها طعم. لأن الطعم كمان بطل ييجي، خاصة بعد ما بقت طلباته كثيرة قوي.

حاجات كثير اضطرنا نغير أماكنها عشان تناسب حياتنا الجديدة. الحضن بقى ذكري، والذكرى بقت حضن. الخناقة بقت تعليق، والتعليق بقى خناقة. القتل بقى حذف، والحذف بقى قتل. اتلخبطت الحاجات في إيدنا مع الوقت ومابقيناش عارفين نستخدمها إزاي. حتى الرياضة ماكانش بتلاقي مكان ليها، فكنا بنلعب "مزايذة". دي لعبة بتنتشن فيها بالماوس على آثار الجروح القديمة في جسم اللي قدامك، فيتكهرب، وينشن عليك هو كمان فتداري آثار جروحك وييجي الماوس على قلبك. والكسبان بيبقى أكثر واحد استحمل ضغطة الماوس من غير ما قلبه يموت، على فكرة اللي قلبه ييموت هنا بيلفه بشاش وقطن ويكمل عايش عادي، كأن عنده صباع مقطوع مثلاً. كلنا كنا زعلانين على بيوتنا القديمة، بس كنا حاسين بأمان عشان هربنا من الحشرات.

مش عارف قرارنا ده كان صح ولا غلط، بس الأكيد إننا كان ممكن نقاوم أكثر ومانهرش بالبساطة دي. تعرف، أنا سمعت عن ناس

واجهت الحشرات دي وانتصرت، أو على الأقل ما اقهزموش. كانوا كل يوم ييطلعوا بأفكار جديدة لمواجهتها. كانوا مثلاً بيناموا وهما باصين لبعض، يلبسوا الأحضان فوق الهدوم مش تحتها، يسموا أولادهم أسامي مفهومة. واللي بيجي منهم هنا بيجي زيارة مش أكثر، يقعد شوية صغرين وبعدين يرجع جري كأن الحرب اللي هناك أرحم كثير من السلام اللي هنا. أنا حكيت لك وإنت نائم عشان ما كنتش حتصدقني غير لو حلمك أكد على كلامي، ولما تصحى، حنفاك إزاي هرب من هنا.

شارعنا اللي غرق في الأحلام

- 1 -

إمبارح كان يوم طويل. ماقدرتش أروّح بدري عشان الشارع
كان مسدود، سألت راجل كبير كان واقف جنبي قال لي إن ماسورة
الأحلام الرئيسية انفجرت وغرقت الشارع ومداخل العمارات.
حطيت ورقة جرنان على الأرض وقعدت.

مريم مابكتش في اليوم ده، أصل الماسورة لما انفجرت رمت لها برنيطة لوها فضي وليها شرايط بيضا زي اللي كانت لابساها الأميرة في الكتاب. يومها مامتها قالت لها إنها تشبهها قوي مش ناقصها غير البرنيطة.

مريم استنت البرنيطة كثير جدا، كانت متأكدة إنها شبه الأميرة وكانت عارفة إن البرنيطة أكيد حتيجي في الوقت المناسب عشان تبقى أميرة بجد ويبقى عندها قدرات خارقة هي كمان، ممكن مثلا تقطع النور عن العالم كله لما القمر يبقى بدر، أو تخلي الكباري تعمل أمواج زي الأكورديون وتطلع مزيكا لما يعدي عليها واحد ميسوط، أو ترسم فراشة وهي مغمضة وتخليها تطير. صقفت مريم وجريت لمامتها عشان تقول لها، لكنها وقفت فجأة قبل ما توصل باب الأوضة. أكيد البرنيطة دي كانت رايحة لبنت تانية، بصت مريم للبرنيطة وكأنها بتشوفها لأول مرة:

معقول إحنا الاتنين نحلم بنفس الحاجة؟ ويا ترى هي كمان
حتبكي لو اتأخرت عليها البرنيطة بتاعتها؟ اتحتت مريم إن ماسورة
الأحلام الرئيسية تنفجر في شارع البنت الثانية هي كمان، وفتحت
الباب وجريت.

لأكثر من ساعتين فضلت مريم تنور الأنوار كلها في الصلاة
والأوض وتمشى وهي لابسة البرنيطة الجديدة، مامتها بصت لها وهي
بتعمل السلطة عشان الغدا وابتسمت وسألتها: نفسك تعملي إيه؟
جريت مريم على أوضتها وطلعت كراسة الرسم، وقع البرتقاني
والبنفسجي من علبة الألوان وهي بتطلعها بسرعة راحت وطت على
الأرض وجابتهم. غمضت عينيها ورسمت.

حركت الفراشة جناحاتها البيضاء. طب ولون جسمها؟ بصت مريم
على لون فستانها وبعدين طلعت اللون الأخضر الفاتح. رفعت الورقة
قدامها، طلعت الفراشة لسقف الأوضة كأنها قمر أخضر. دارت من
غير صوت، والنور بينعكس على جناحاتها. مامتها بتقول إن انعكاس
النور هو اللي يفرق بين الحلم والحقيقة. قربت الفراشة من الشباك،
دق قلب مريم بسرعة، هاتخرج دلوقتي؟ لكن الفراشة لفت ورجعت
تاني وقفت على كفها اليمين. ابتسمت ابتسامة واسعة، يا ترى
حتعمل إيه ميس سحر بكرة وهي بتوريها الرسمة دي في حصة الرسم.

طاهر جري من الفرح لوسط الشارع، عدى وسط الأحلام
المتراكمة ووقف قدام شجرة برتقان بتطل منها الشمس. كانت هي
هي، بالظبط شجرة أحلامه للدرجة إنه ماصدقش إنها رايحة لحد غيره.
قرب من الشجرة، دلوقتي حينور اللون البرتقاني فوق جلده، وحيشم
الغصون اللي عليها الندى، ودلوقتي حيطير عشان يقطف البرتقان
زي زمان، قبل باباه ما يسافر سفر طويل وياخد الجناحات معاه وقبل
مامته ما تقطع الشجرة الوحيدة في الجنية عشان ريحة البرتقان بتخط
على الشباك بالليل ومش بتخليها تنام. فتح طاهر عينيه لقي راجل
كبير مايعرفوش بيص له ويتسم، رجع خطوتين بعيد عنه لكنه لقاه
بيكلمه، قال له:

- أنا كنت شبهك وأنا صغير، حتى شوف.

طاهر مافهمش حاجة بس بص على الصورة اللي طلعتها الراجل
من محفظته، كانت صورة أبيض وإسود وكان فيها ولد شبهه وباباه

شايله، كان الولد لابس برنيطة صوف شكلها غريب عمره ما شاف
زيها قبل كده.

الراجل شاور على البرنيطة وقال:

- الصورة دي لما كنا في موسكو، تعرف فين موسكو؟ شاطر!
كنا عايشين هناك، هناك بلبسوا حاجات زي دي عشان عندهم برد
قوي مش زي هنا. تعرف إن الطاقية دي لسه معايا لحد دلوقتي.
استنى.

طلع الراجل من شنتطته برنيطة شبه اللي في الصورة وحطها على
راس طاهر، ابتسم طاهر ابتسامة واسعة عشان البتاعة دي كانت
دافية قوي، بس مافهمش ليه الراجل ملامحه اتغيرت فجأة وبقي شكله
زعلان وكأنه حييعط. الراجل قال له:

- تعرف، لو كان ليا ابن كان حيقى كده بالظبط.

طاهر ماعرفش يرد يقول إيه، الراجل سأل له:

- إنت في مدرسة إيه؟

قال له:

- أنا في الحرية.

سأله تاني:

- تعرف إنما في طريق شغلي، بس دي بعيدة قوي، مين بيوديك،
بابا؟

طاهر هز راسه:

- لأ، أنا باروح لوحدي.

الراجل حضنه قوي:

- طيب ممكن، لو تحب يعني، نبقى نروح مع بعض؟

- حاقول لما ما في الأول.

قالها بسرعة ورجع وقف قدام الشجرة من جديد، فرد ذراعاته
وغمض عينيه، وماحسش غير وهو يبطير لحد ما خده لمس البرتقان
المنور بالشمس.

بين الزحمة الكبيرة اللي مغرقة الشارع وقفت منى قدام مشهد غريب، كانت "صباح الخير" واقفة لوحدها مسنودة على الحيطه. منى استغربت قوي وسألت نفسها أكيد دي جات من ماسورة الأحلام، بس مين اللي ممكن يحلم بحاجة بسيطة قوي كده.

منى شاورت لها من بعيد وقالت: صباح النور. بصت "صباح الخير" وابتسمت فعزمت عليها منى إنها تيجي تقعد جنبها وجابت لها عصير قصب. قالت لمنى إنها كان المفروض رضوى تديها لمامتها قبل ما تخرج لأن مامتها كانت بتحلم بده - ده بس، تخيلي! - بعد ما اتغيرت معاملة رضوى ليها من غير سبب، لدرجة إنها حاولت تحط لها "صباح الخير" بين هدومها أو في الشامبو بتاعها، أو تحوله للمح وتحطه على الشوربة أو لبننت صغيرة تلمس إيدها وتجري.

منى اتأثرت قوي وقالت لها: بس لو فضلت الماسورة مسدودة ممكن تتأخري. ابتسمت "صباح الخير" وقالت لها: أنا اتعودت على التأخير، واتعودت حتى على عدم الوصول. الناس من زمان بيغسلوا وشهم بحروفي المنورة وبعدين يرموني من غير اهتمام كأني منديل ورق مستعمل، بس دي أول مرة حد يفكر فيا ويعبرني بـ "صباح النور" واحدة زي ما إنتي عملتي، إحنا ممكن نبقى أصحاب لو حبيتي.

باستها "صباح الخير" على خدها. بصت منى على الموبايل بتاعها اللي شاشته نورت فجأة وطلع النغمة المخصصة للرسائل كذا مرة ورا بعض، كانت كلها من بنتها وصاحبها وجوزها، قرّنها كلها وبعدين بصت لصاحبها الجديدة وحضنتها جامد.

"صباح الخير يا ماما"

"صباح الخير يا منمن واحشائي"

"صباح الخير يا حبيتي"

المشهد كان ملخبط وغرقان في الفوضى، عشرات الحاجات مرمية على الأرض ومتكومة جنب الحيطان والناس عمالين يتكعبلوا بينهم وهما يحاولوا يدوروا على كل اللي ما يخصهمش. كان فيه ناس يفتحوا رسايل وبيتجسسوا على اللي الناس يحلموا يعرفوه وبعدين يرموا الأظرف الفاضية ياهمال، وناس تانية بتقيس الأحضان أو بتدوق لحظات الانتقام. كان فيه ستات بتجرب الجوهرات اللي بترجع الزمن، والفساتين القصيرة اللي بتشفى من الأمراض الجلدية ونوبات الملل. وفي آخر الشارع كان شباب كثير بيتفرجوا على ماركات العرييات اللي طلعت من الماسورة، يلقوا حوايلها ويلمسوها ويفتحوها وبعدين بيدؤوا يشغلوها. كانوا بيستغربوا جدا لما يلاقوا العرييات الصغيرة بتوسع لما يركبوا فيها، والعرييات الكبيرة الغالية بتضيق عليهم كأنها بتخنقهم بمجرد ما يدخلوا. كان فيه ركن مهمل،

فيه كرسي كبير شبه العرش، وملاك شایل كيس فشار مايخلصش، وبراويز بتسمح للناس بالدخول عشان تقعد شوية مع الناس اللي في الصور. لأ، ده اللي لفت نظري!

جنب مدخل بيت كانت بنت بتسحب من الكومة الكبيرة صندوق كارتون شكله تقيل لحد ما سندته جنب الرصيف، وقفت فوقه بشويش فقعد يكبر ويعلا لحد ما بقى بحجم الأتوبيس. شاورت لفوق فترلت عليه ستاير وبقي مسرح حقيقي. كانت مبتسمة زي ما تكون عارفة كويس هي بتعمل إيه. دارت حوالين نفسها فطال فستانها واتملا بأعصان الشجر، دارت كمان فبقى شفاف زي لبس الجنيات، فضلت تدور تدور وفي كل مرة تلبس فستان جديد وتضحك. في الآخر نامت على ظهرها فاتملا المسرح نجيل وجريت قطعة بيضا وقطة سودا وقفوا عند رجليها. حركت أيدها وشاورت لي من غير ما تفتح عينيها وقالت: أَيُّهَا الْغَرِيبُ الَّذِي لَا يُحْسِنُ اخْتِيَارَ رِخْلَتِهِ، لِمَاذَا لَا تُغْنِي لِي.

مارديتش، كأني خفت إنها تفوق لو أنا اتكلمت. بس هي وقفت فجأة ونطت من فوق المسرح فرجع الصندوق زي ما كان. لكن بصتها فضلت زي ما هي. طلعت من شنطتها ورقة صغيرة ملونة وناولتها لي. بصيت على الورقة، كانت نايمة جنب شباب تانيين وبنات أول مرة أشوفهم، مغمضين عينيهم ووراهم مسطح أزرق شبه البحر، وعنوان "أوسع من الأرض.. وأحلى من البشر"

قلت لها: ممثلة؟

هزت راسها. بصيت على الصندوق وقلت: ده حلمك؟

بصت لي وضحكت: لأ، أنا حلمي أكبر من كده، حلمي أعمل في قلبك زي ما عملت في الصندوق ده.

رفعت راسي وفوجئت بعربية نقل كبيرة واقفة على أول الشارع، نزل منها عمال كثير لابسين زي موحد، دخلوا واتوغلوا وسط الأكوام لحد ما اختفوا. جه ناحيتنا واحد منهم وشاور على الصندوق وقال:

- يا أستاذ، بعد إذنك.

سألته:

- إنتوا مين؟

- إحنا عمال من الحي، المفروض نصلح الماسورة ونرجع الحاجات لأصحابها.

سكت الناس كلهم فجأة، وقفت الدوشة اللي كانت شغالة وفضلوا كلهم يبصوا على بعض وعلى العمال اللي كانوا بدؤوا يلموا الحاجات فعلا. هزت البنت اللي جنبي راسها وقالت:

- يا بخته، أو يا بختها!

فاجنني صوتها وهي بتشاور على العامل اللي أخذ الصندوق، لقيت نفسي فرحان كأني كنت فاكهه حياخدها هي كمان مع الكتب، ضحكت على الفكرة فبصت لي باستغراب.

تاني يوم الصبح كان مختلف، كنت قضيت الليل كله في البلكونة
سهرة لحد الصبح، وباتخيل الإحباط والمرارة اللي حيقوا على
وشوش الناس وهما رايحين أشغالهم تاني يوم، بعد ما العمال أخذوا كل
الحاجات اللي لقيوها إمبارح. قبل الفجر بشوية كان الشارع اتصلح
والأحلام اللي متكومة على جنب الطريق اتشالت. وعلى الساعة
سبعة كده بدأ الناس يخرجوا. كانت حركتهم خفيفة وكانوا مبتسمين
كأنهم لسه إمبارح. أولهم كان طاهر اللي نزل السلم جري وراح عند
راجل أول مرة أشوفه في شارعنا، طار على دراعه لحد ما ركب
العربية بتاعته. بعده نزلت مريم ماسكة إيد مامتها، وكانت شائلة في
أيدها الثانية كراسة رسم كبيرة بتتهز كأنها حتطير. وبعدين نزلت منى
ماشية ناحية موقف الأتوبيس، لكنها كانت بتقف كل شوية تبص
لشاشة الموبايل، وتبتسم فجأة كأن حد باس خدها.

فضلت أبص على الأسفلت الصلب المستوي، المقفول على
الأحلام الكثير اللي معدية تحته، وبالتحسر على المدة القصيرة اللي فتح
لنا فيها بوابته عشان نفرح بالحاجات اللي بنحبها. بس ابتسمت من
جديد لما حطيت إيدي في جيبى من غير ما أحس وطلعت ورقة صغيرة
ملونة نايم فيها بنات وشباب عيونهم مغمضين، بصيت على العنوان
المكتوب تحت الورقة ودخلت عشان أغير هدومي.

ذاكرة على شكل بيت

صباح الخير، إزيك يا أستاذ مصطفى، اتفضل استريح، أبدا أنا
حببت أدردش معاك شوية.

المسألة إنك بقيت تتأخر كثير على مواعيد الشغل، وتركيزك في
الملفات بتاعتك كمان بيقل، حتى المتابعات مع العملاء اللي هي -
إنت عارف طبعا - أهم من الاتفاق نفسه.

إنت مش بتحب شغلك، ده واضح. بس خليني أقول لك حاجة
يمكن تستغرب لها: مش دي المشكلة. المشكلة إنك بتصرف مهدوء،
باستخفاف. كأنك مش عارف ده ممكن يكون معناه إيه. مش حابب
تقعّد جنب الشباك؟ الشمس مضايقة عينك صح، أكيد عشان

موضوع الهالات السوداء اللي بتشوفها طول الوقت، عرفت مين؟
دلوقتي أقول لك. تقدر تقعد هنا بعيد عن الشمس.

مصطفى إنت عندك فكرة أنا اشتغلت في كام مهنة قبل ما آجي
هنا، عندك فكرة ده كان ممكن يعمل إيه. لا أنا مش عاوزك تعتذر،
قلت لك إن ده مش مهم.

أنا اشتغلت مساحات في عربية عشان أزيح مية المطر من على
القزاز، بس صاحب العربية طردني لما لقاني باشتغل لوحدي كل ما
يترل المطر، لفترة طويلة ما كنتش فاهم إزاي حد يقرر إنه يمشي في
طريقه من غير ما يساعد نفسه عشان يشوف بوضوح. اشتغلت
نتيجة حائط عند تاجر قماش، بس سبت الشغل بعد فترة لما لقيته
بيص لي باهتمام من وقت للتاني وأنا شايل تاريخ قديم ما شالش
الورقة بتاعته من ساعتها. اشتغلت كمان راديو عند ست عجوزة
عايشة لوحدها، كانت بتحب تسهر على أغاني أم كلثوم وأسمهان
لكنها بتبدأ تنعس أول ما بتيجي النشرة، طردتني عشان مرة عليت
صوتي فجأة في خير مهم في وقت كانت هي بتتاوب وبتزهز دماغها
وتدندن بصوت واطي "اللي يحب يبان في عينه".

اشتغلت حتى في مهن غير شريفة، اشتغلت مثلاً كسّر في رجل
بنت صغيرة، كانت مهمتي إني أفضل أعض في رجلها بشكل مستمر
عشان ماتنامش، بس قلبي ما طاوعنيش، والموضوع انتهى بإفهم

طردوني لما لاحظوا إن البنت بطلت تصرخ وبقت بتبص لرجلها
المكسورة وتططب عليها بشويش وبتتنفس براحتها. اشتغلت حتى
شماعة عند وزير كان بيعلق عليا أخطاؤه، الوظيفة دي ماحدش يقدر
يوصل لها بالساهل، وكانوا ناس كثير بيحسدوني عليها. بس أنا
ماكملتش فيها كام يوم وهربت عشان ما استحملتش ريحة أخطاء
الوزير اللي كان بيرميها عليا طول الوقت.

وقتها بدأت تظهر الهالات.

كانت مجرد حبوب سودا صغيرة، باشوفها كل ما أبص للضوء
القوي. ماكتتش خايف، افكرتها رمد ربيعي زي اللي جالي قبل كده.
لكنها بدأت تكبر، وتحول لهالات بتحاوط كل حاجة، هالات سمكة
كانها شبابيك زنزانة. كان صدري بيضيق فعلا كأني مسحون.
ومابقتش مرتبطة بالضوء القوي بس، كنت باشوفها في السما، في
عواميد النور، في شاشات التلفزيون. بعدين بقيت أشوفها في الورد
اللي ألوانه فاتحة، وفي الوشوش اللي بتضحك من غير سبب. كأن فيه
مرض جلدي غريب أصاب الدنيا. وبقيت خايف.

رحت لدكاترة كثير وبياعين بخور وحراس مراجيح، حتى العمال
اللي بيلمعوا القزاز رحلهم. بس كان الموضوع بيزيد كل ما
جربت دوا جديد. بطلت كل الأدوية، واستسلمت للسور اللي
بيتبني بيني وبين العالم. لحد ما لقيت نفسي باشتغل في ورشة لتصليح
الذاكرة.

تعرف، دي كانت أجمل أيام حياتي. كان الناس بيعجوا لنا شايلين ذاكرة مكسورة محتاجة ترميم، وساعات ذاكرة قديمة وبتشوك عشان ننصفها ونغسلها لحد ما ترجع زي الجديدة بالظبط. ساعات بتكون الذاكرة اللي شايلينها على شكل قطعة، أو كتاب، أو قطر، أو حتى غصن شجرة. والمفروض نتعامل مع كل حاجة لوحدها. الأسطى كان يقول لنا لو شربتوا الصنعة حتقدروا تصلحوا أي حاجة حصلت أو ماحصلتش، لأن دي الصنعة الوحيدة اللي باب النجار فيها مش ممكن يكون مخلع. كنت حابب الشغل وحابب المكان، لدرجة إني ساعات كنت باتمنى أفضل هناك على طول.

في المكان ده بدأت الهالات تتصرف بشكل غريب، كانت بتصغر كل ما أدخل من باب الورشة، تصغر وتبعد كأنها خفافيش بتهرب. كنت بانسى وجودها تماما طول اليوم. لكنها كانت بتراجع بمجرد ما أخرج، تهاجمني زي مطر إسود عنيف لدرجة إني ممكن يغمى عليا.

وفي يوم جالنا راجل إيده فاضية، أصل الذاكرة بتاعته كانت على شكل بيت. الأسطى بعني معاه على بيته، طول الطريق كان الراجل بيشكي لي إنه مش عارف ينام في أوضته، وإن هدومه على الحبل مش بتنشف بسرعة. بدأت أسأله أسئلي المعتادة: مين كان ساكن معاك - إمتى مشيوا - وليه - إيه أول حاجة بتعملها أول ما بتصحى - عدد الكتب في المكتبة اللي مرسوم على أغلفتها ورد؟

دخلت معاه البيت، بيته كان وحش فعلا. الراجل ده بيعامل ذاكرته بقسوة. عملت معاينة سريعة: بقعة شاي على أرضية الصالة / آثار رجلين في البلكونة فوقها صوت واحدة ست مركون ومليان تراب / مروحة في أوضة الأطفال مابتشتغلش أبدا وهو موجود، وحاجات تانية كتير.

خفت إني ما اقدرش أصلح كل ده. فتحت الشنطة، طلعت قلم رصاص ومنديل صغير. رسمت كباية شاي نص مليانة فوق البقعة اللي في الصالة، وبين آثار الرجلين والصوت القديم رسمت واحدة ست بتلم الغسيل من الحبل، وفوق الحطة النازلة اللي في كرسي الصالون رسمت راجل عجوز ييقرا تفسير الشعراوي. بعدين طلعت قلم أكبر ورسمت قفل كبير على باب أوضة الأطفال. ريحة الورد كانت أكثر حاجة تعبتي، عشان كانت قديمة قوي وداخله في بعض، قعدت أرسم كل أنواع الورد اللي أعرفها وأغير في أماكنها لحد ما حطيت بنفسج على ترايزة الصالة وورد بلدي أحمر في الصالون جنب المكتبة فلقيت الريحة اتظبطت. أما الصوت اللي لقيته في سلك التليفون فماكنتش أقدر طبعا أرسم له حد بيتكلم على الناحية الثانية، فانتهزت فرصة انشغاله بحفظ أماكن الرسومات وخبيت الصوت في جيبي من غير ما يحس.

الراجل كان واقف مستغرب، كان لسة مش فاهم أنا عملت إيه، قلت له: اللي إنت عملته ده خطأ شائع بيقع فيه ناس كثير لما ذاكرهم بتعطل فجأة. إنت قعدت تكنس وتمسح في البيت وتغير ألوان الدهان كل يوم بعنف وبكركة، وإنت متصور إنه كده حيرجع جديد. بس المسح العنيف يثبت الذكريات أكثر. سيب الرسومات دي مكانها، وهي حتاخذ بواقى الزمن وحتروح لوحدها بالتدريج.

قال:

- طب ولو كلمتني؟

قلت له:

- كلمها، بس اوعى تلمسها، لأنك لو لمستها مش حتروح أبدا. حطيت كفي فوق عيني وأنا خارج عشان ما اشوفش الهالات، لكنها ماجاتش. مشيت بشويش في الشمس وأنا باتلفت حواليا. النور كان غزير كأنه فمر، واسع كأنه شراع مفرد، ناعم كأنه ملايين من الورد الأبيض اللي بيقع من السما. كنت ماشي كأني في حلم. النور كان بيسيل على كل حاجة فتشرب منه، الشجر والشوارع ووشوش الناس وحتى الحشرات المستخبية. مافيش حاجة ليها ضل، أو جوانب مخفية. كل حاجة شربت لحد ما اكتملت. النور يجري لي ويجري مني في كل مكان، ومافيش أي حاجة تحاصره أو حتى تضايقه.

كأن بقى من حقي أشبع لأول مرة من زمان. فاهم الإحساس ده؟
عارف إني طوّلت عليك، بس إنت ماعندكش فكرة استمرارك
هنا ممكن يعمل إيه في عينيك. كل يوم الهالات بتكبر، وكمية النور
اللي العالم يساهم بيها في تشكيل يومك بتقل، تقل، لحد ما تمشي
تدور على شباك نور تمشي وراه. أنا بس كنت باحاول إنك
ماتفهمنيش غلط، أو تزعل من اللي حاقله: أنا مش عاوزك تشتغل
هنا تاني، لأنك حاولت فعلا إنك تحب المكان بس ماقدرتش.
ماتشكرنيش، بس ابقى طمني لما تبقى كويس.

حدوتة مش كاملة

النهارده الصبح وأنا باقلب في ملفات الكتابة على اللاب توب، لقيت حدوتة مش كاملة، مع إن بقالها فترة كبيرة، ومع إن اسمها جميل جدا "كنت بادور عليكى.. إنتي كنتي فين". دست على الملف عشان أفتحه، لقيته اختفى من على الشاشة ومكانه ظهرت بوابة مفتوحة، باين منها طريق مليون شجر. ماعرفتش أعمل إيه، كانت أول مرة يحصل معايا كده، بس أنا كنت مهتم جدا أعرف إيه اللي حصل للحدوتة. رحت داخل من البوابة دي.

الطريق كان متحاط بشجر فعلا، بس شجر غريب، قصير كأنه مش مبسوط أو مش شارب ميا كفاية. فضلت أمشي لغاية ما قابلت راجل بص لي باستغراب وقال لي:

- إنت جيت منين؟

قلت له:

- أنا بادور على الحدوة بتاعتي.

قال لي:

- غريبة جدا، إنت أول واحد يجي هنا عشان يدور على حاجة.

قلت له:

- هنا فين؟

قال لي:

- تعالى معايا، عشان لو شافوك ممكن يشكوا فيك. أنا اسمي "جَين".

مد إيده اليمين عشان يسلم عليا، لقيتها مش موجودة، وطالع مكانها ورقة مرسوم عليها إيد شبه إيده الشمال بالظبط. ماعرفتش أعمل حاجة غير إني أسلم على الورقة، ومشيت معاه.

فضلنا ماشيين لحد ما دخلنا مدينة غريبة. كل حاجة في المدينة كان عندها جزء ناقص ومرسوم على ورقة زي الإيد اليمين بتاعة جنين. الناس كان فيه منهم اللي من غير راس لكن راسه مرسومة على ورقة فوق كتافه، واللي من غير ذراع واللي من غير قلب.

البيوت كانت فيها أدوار مرسومة برضو، والغريب إنما مش دائما
الأدوار الأخيرة، أنا فعلا ما كنتش فاهم إزاي ورقة مرسوم عليها
حيطان وشبايك تقدر تشيل أدوار طوب وأسمنت. الأطفال كانت
بتصطاد المكالمات اللي بتقطع وبتفضل متعلقة في الهوا، الستات
كانت بتجيب ورق مكتوب عليه "ريجيم" وتلزقه على أجسامها
فتخس فجأة لمدة دقيقة وبعدها تتخن تاني، الناس الكبيرة كانوا بيلفوا
نفسهم بورق أصفر قديم عليه أحداث وتواريخ، ومع كل نسمة هوا
يمسكوا في الورق جامد عشان مايطيرش. كنت ساعات بالاقى اتبين
يجوا يتكلموا بس الجملة تقف في النص وتطلع مكانها ورقة مرسوم
فيها حاجات، أو ولد وبنت يحاولوا يمسكوا إيد بعض فيقفوا وتمد
إيديهم مرسومين على ورق بيتهز مع الهوا. وكان فيه شارع ضلمة
حاول جنين إني ما امشيش فيه، بس أنا كنت مصمم أدور في كل
مكان. الشارع ده كان فيه ناس بتطير طول الوقت، وناس ماسكة في
إيدها عيدان كبريت مابتطفيش أبدا، وناس غضبانة جدا بتحاول
تكتب كلام على ورق بس القلم مش راضي يلمس الورقة. بصراحة
أنا حمدت ربنا لما خرجنا من الشارع ده، خاصة بعد ما عرفت إن كل
دي كانت محاولات انتحار.

قعدنا أنا وجنين على قهوة، المكان كله كان مخيف جدا. بصيت
لجنين من غير ما أتكلم رغم إن جوايا أسئلة كتير. هو كمان كان
بيص لي من غير ما يتكلم كأنه بيجابو. الكراسي طبعا كانت

رجليها مرسومة، والكبايات كانت مليانة فتحات ومع ذلك مافيش حاجة بتتسرب منها.

سألت جنين:

- مين الناس اللي عايشين هنا؟

قال لي:

- هنا المحاولات غير المكتملة للحياة. في الأول اتبنى المكان ده عشان يكون سجن كبير لقطاع الطرق وعمال المونتاج ودكاترة الإجهاض، وبعدين بقوا بيعجبوا هنا كل اللي مش بيكمل أي حاجة في حياته. بس بعد كده إحنا عملنا ثورة، وسيطرننا على المكان زي ما إنت شايف. عملناه مملكتنا الخاصة، جنتنا الموعودة. وبدل ما كنا محبوسين جواه، حبسنا البشر برا.

سأله:

- وإنتوا جيتوا هنا إزاي؟

قال لي:

- زي الحدوتة بتاعتك بالظبط. بنحوّش "عدم اهتمام" لحد ما نجيب من التذكرة، وبنيجي.

قلت له:

- وعاشين إزاي؟

بصر لي وقال:

- بناكل أعماركم، أعمار البشر كلهم، وبنحلي بلحظاتكم
الحلوة، بنشحن التليفونات من رصيد الأمل بتاعكم، وبننور الشوارع
بالرضا اللي بيطلع من نظراتكم لنفسكم في المراية. أصل كل حاجة
بتيجي هنا من غير ما تكمل، بتاخذ من صاحبها كل ده.

ريقى بقى ناشف.

سألته:

- ودي ماتبقاش سرقة؟

اتعصب جنين، وقال لي:

- إحنا بنلاقي أدراج حياتكم مفتوحة. فبناخد اللي محتاجينه
عشان نعيش، وبعدين تفتكر السرقة مؤذية أكثر ولا إنك تعيش
حياتك كلها بأطراف مرسومة.

ماعرفتش أرد. بصيت حواليا لقيت الناس كلها بتبص لنا، ويتدقق
فيا كأنها بتدور على الورقة المرسومة. كان في بالي أسئلة كتير. يا ترى
الحدوتة ممكن تكون فين، وممكن تكون خدت مني إيه قبل ما تمشي. يا
ترى فيه حاجات تاني ليا هنا. ويا ترى أنا جاي فعلا عشان أدور على
الحدوتة ولا أنا إنسان ماكملش حاجة في حياته زيههم، وحافضل هنا

على طول لحد ما يطلع لي رجل أو عين أو رئة مرسومة على ورقة.
حاولت أسأله عن الحدوة، فقلت له:

- هي الحدوة بتا...-

وفجأة لقيت طالع من بقي ورقة مرسوم فيها حاجات. انخضت،
بس هو طبطب عليا وقال لي:

تعالى معايا.

مشينا مع بعض لحد ما وصلنا المستشفى. عرفت إن الحاجات
الجديدة لازم تيجي على هنا. في المستشفى فيه دكاترة كثير من كل
التخصصات. منهم اللي بيخطط العلاقات اللي بتقطع، واللي بيصفي
الأفكار المجنونة من الرمل والزلط الصغير والخوف من الناس، واللي
بيصلح الحاجات اللي بتتكسر، من أول القواقع الصغيرة لحد
القطورات الحقيقية. فضلت ماشي لحد ما لقيت القسم اللي بيرسموا
فيه الكلام اللي اتقطع. دخلت. لقيت الحدوة بتاعتي نائمة على سرير
ومتعلق لها محلول، المحلول كان عبارة عن ميا دايب فيها كلام كثير أنا
قلته وأنا نايم. قربت منها فبصت لي، ابتسمت قوي وقالت لي:

- إنت بجد جيت لحد هنا؟

هزيت راسي فقالت:

- أنا سامحتك خلاص، بس إنت عرفت مكاني إزاي؟

قلت لها:

- القلب فيه بوصلة، بتشاور على الحنة اللي ناقصة فيه.

ابتسمت أكثر لأن دي كانت أول جملة فيها. قلت لها: أنا حاستأذن من الدكتور بتاعك وحاخدك معايا، بس بشرط، بعد كده لو حسيتي إن اهتمامي بيكي بيقل، ما تمشيش على طول. قالت لي: وأنا كمان ليا شرط، إنت مش حتسألني أنا خدت منك إيه قبل ما أمشي.

ابتسمنا إحنا الاتنين، وما خدناش بالناس الكثير اللي كانوا واقفين ورانا، دكاترة وعيانيين. أصلهم من زمان ماشافوش كام جملة ورا بعض يخلصوا من غير ما يطلع منهم ورق في النص. لدرجة إنهم شكوا إنهم فقدوا السيطرة، وإن المكان حيرج سجن تاني.

بس أنا ابتسمت، قلت لهم: ما تخافوش، السر فيي... ..

وطلعت ورقة من كلامي مرسوم عليها بير غويط، أخذت الحدودة بتاعتي ونزلنا فيه لحد ما رجعنا الأوضة. فتحت الملف، وقعدت أكتب.

الكاتب

- مصطفى السيد سمير

- كاتب وطبيب مصري

صدر للكاتب :

1- صحيان بطيء من حلم جميل.. شعر - 2008 - دار اكتب

2- حارس ليلي للسماء.. قصص - 2013 - دار اكتب

حصلت المجموعة القصصية على جائزة المسابقة الأدبية للمركزية
للهيئة العامة لقصور الثقافة 2012

تحت الطبع :

- ملامسة السماء.. هكذا .. شعر

الحاصلة على جائزة مسابقة جريدة أخبار الأدب 2015

4- ويسألونك عن الدفء.. قصص

تابعوا الحواديت على صفحة "مصطفى السيد سمير

يحكي" على فيس بوك

**WWW.FACEBOOK.COM/MOSTAFASA
MIR2007**

الحواديت

حواديت الورد الأخضر

- 15 معجون بشمس الخيال
- 19 مخلوقات أليفة
- 25 الشوارع
- 29 لغة بتحفظ توازن العالم

حواديت المطر

- 39 B FOR BLOGGER
- 45 فيما يرى القاعد بين الصحيان والنوم
- 55 زينب مش بتكتب شعر
- 65 مدينة الذكريات السعيدة

حواديت الأتوبيس

- 77 رفقة العجلاني
- 89 بيع الأمان
- 97 مش ييشوفوا في النور.. ويعملوا ريحة للعنينا
- 107 حضن النور وحضن السكر
- 113 أسما

حواديت الحب

- 125 أنا باطلّ عليك منك
- 133 لما البنت رجعت من الحرب
- 139 لما الولد رجع من الحرب
- 145 التعب

حواديت الضل

- 157 دولاب أزرق كبير
- 163 شارعنا اللي غرق في الأحلام
- 177 ذاكرة على شكل بيت
- 185 حدوة مش كاملة

